

道園學古錄

冊六

道園學古錄卷之二十四

應制錄四

雍虞集伯生

碑銘

曹南王勳德碑

中書右丞相臣燕帖木兒等言 陛下入正大統道汴梁命山東河  
北蒙古軍都萬戶府都萬戶野速迭兒以其兵從至京師以功拜河  
南等處行中書省平章政事於法官一品當贈三代官封也速迭兒  
曾大父撥徹大父也柳干父阿剌罕嘗爲大將戰功多又皆死王事  
軍中宜追封以第一等爵制曰可有司以詔書議贈所當得官按地  
定封於是故贈定威佐運功臣榮祿大夫司徒上柱國曹國公諡忠  
定撥徹加贈定威佐運功臣光祿大夫司徒上柱國追封曹南王諡  
如故故蒙古漢軍都元帥贈宣忠靖遠功臣光祿大夫中書右丞相  
上柱國曹國公也柳干加贈宣忠靖遠佐運功臣金紫光祿大夫中  
書右丞相上柱國追封曹南王仍諡桓毅故光祿大夫中書左丞相  
贈協謀佐理功臣太師開府儀同三司上柱國曹國公諡武定阿剌  
罕加贈竭誠宣力定遠佐運功臣太師開府儀同三司上柱國追封  
曹南王改諡忠宣曾祖母塔拜祖母滅烈母脫端驪倫皆先封曹

國夫人改封曹南王夫人制下有勅國史臣集其以曹南王世家行事歲月著文于其神道之碑臣集受詔謹按撥徹蒙古札刺兒台氏太祖皇帝初起朔方豪傑之士雲起響應而從之爲之腹心爪牙者必皆有深智遠識有勇而善謀是以東征西伐無不如志以成萬世之業者天爲之生材而聖神善用之故也撥徹自其幼年已在宿衛爲火兒赤火兒赤者服御弓矢常侍左右者也又爲博兒赤博兒赤者親烹飪以奉上飲食者也蓋非篤慎強敏見知而親信任使者不得預是以屬車所向無不在行數以徇戰掠地著功受賞

太宗皇帝卽位仍以其職從征行隴北陝西之役攻城壁取郡縣率先戰士竟死之也柳干繼爲火兒赤博兒赤膺其父之職也以太宗之命事岳里吉太子爲番衛之長歲乙未闕出忽都禿太子出師伐金遂侵宋有旨出從戰戰有功拜萬戶方是時察罕以太祖所拔重臣爲大將位望崇甚而也柳干以天下馬步禁軍都元帥爲察罕之副總領諸翼蒙古漢軍馬統領屯戍大軍南面之征最爲重兵矣於是取陝西掠河東踐河南歲乙卯擣光壽大帥察罕歿

憲宗皇帝命也柳干代之拜諸翼軍馬都元帥統大軍攻淮東西諸城歲戊午帥師至揚州數出戰遂以戰死阿刺罕以諸翼蒙古軍馬

都元帥統其父之軍從

世祖皇帝南伐宋 憲宗崩 世祖北還卽皇帝位從至末黎伯顏

孛剌之地阿里不哥阿藍歹兒渾都海興兵爲亂不受詔命討之阿  
剌罕以其所部蒙古軍擊之北至晉門禿之地遂追之至河西功成  
而還中統建元之歲賞功賜黃金五十兩日耳答衣九襲日耳答者  
西域織文之最貴者也二年濟南帥李壇以山東反大發兵討之阿  
剌罕總其衆次老倉口以進戰明年濟南破壇誅山東平師還又明  
年賞功賜黃金虎符一銀印一弓一矢百弓矢之服黃金飾其具馬  
鞍轡一黃金塗銀飾其具以舊官將其軍至元初大軍伐宋五年師  
圍襄樊力戰數有功論賞賜白金五十兩金織文衣九襲十一年取  
宋大軍渡江阿剌罕以其師取鄂州泝江陵下至荊口所至郡縣降  
其軍慰撫其民人明年拜昭毅大將軍統其師發建康道溧水溧陽  
指獨松關抵杭州上方道與宋將吳某等戰斬之斬首七千級又與  
宋將祝亮戰擒亮并其裨校七十二人斬首三千餘級又與宋兵戰  
斬首七千餘級又斬逐其援兵退走數十里宋將奉使吳某都統丁  
某總制趙某來逆戰敗之斬首二千級擒總制谷某又擒宋將張八  
其裨校斬首二千級六月卽軍中拜中奉大夫行中書省參知政事



是年宋亡明年伯顏丞相以宋主入覲九月阿剌罕帥師東渡浙取  
越明溫台衢婺處及閩中諸郡追宋宗室秀王某道數戰皆敗之降  
其運使趙某提刑趙某五百餘人至福州與宋軍轉戰四十餘里斬  
步帥觀察使李世達等於陣殲其軍獲秀王及其家屬將吏百八十  
餘人降其部曲淮卒三千人於是江南悉平十二月有詔以中奉大  
夫中書參知政事授金虎符行江東宣慰使郡縣新附民心未安威  
信未孚莫不悅服十四年入覲 上嘉其功慰勞甚厚進拜資善大  
夫中書左丞仍還宣慰江東十六年六月進拜資德大夫中書右丞  
仍留宣慰江東十八年入覲方是時海內悉已平定舟車所至莫不  
服從而日本叢爾海島之間恃固自保有司以致討爲言 天子從  
之迺賜玉帶一金鞍一弓一矢百弓矢之服具命爲中書左丞相行  
省事統蒙古諸翼軍馬四十餘萬往征之師次明州且渡海矣病歿  
旣歿而子也速迭兒幼拜降也速迭兒之兄也襲世職爲萬戶總其  
軍後以功僉書江淮行樞密院事進拜江浙行省右丞福建行省右  
丞河南行省平章政事仍領其先世萬戶軍馬旣歿也速迭兒以元  
貞元年世其職授昭勇大將軍左手蒙古軍萬戶佩金虎符 武宗  
皇帝在位思勳舊將帥之家求其子孫之有功有能者故於也速迭

兒有加賚焉命玉工刻白玉爲也速迭兒所署字使以畫文書發號令於所部使知其爲上所尊信者皇慶改元賜白銀五十兩金織文衣二襲延祐三年覃恩加昭毅大將軍至治改元賜白金五十兩金織文衣二襲泰定三年進昭武大將軍皆以萬戶總其軍如故後二

年  
今上皇帝南還京師將有大正於天下道過汴梁今太保伯顏公方鎮汴省八月庚子召也速迭兒帥其兵以行乙巳兵大集士卒感激赴義車馬器械精備勇氣百倍丁未命爲本省參知政事賜黃金五十兩玉帶一鑲鐵鑲刀一師行庚戌進爲本省平章政事仍兼山東河北蒙古軍都萬戶府都萬戶賜銀印一金三珠虎符一黃金五十兩白金倍之玉帶一海東青鶻一至真定賜名馬二至新樂驛賜黃金五十兩甲一襲至慶都賜碼碯盤杆一繡青絨袍一九月庚申爲同知樞密院事仍兼都萬戶賜寶飾鑲鐵搥一鑲鐵寶刀一壬申皇帝卽位大明殿建元天曆明日拜知樞密院事授以樞密院印仍領其萬戶事甲戌禿滿達兒自遼東引兵寇通州賜寶劍弓矢鞍轡令也速迭兒帥諸翼軍馬出禦之丙子王禪等之兵軍於北皇后店也速迭兒移兵合擊敗之己卯哈剌赤渾都帖木兒阿剌帖木兒之

兵軍於昌平縣東白浮邨帥師合擊敗之壬午昔寶赤大都之兵軍於昌平縣東北又帥師合擊敗之凡來寇之兵悉已敗歟總兵者或執或敗走北方悉平癸未太師右丞相會諸將於龍虎臺下奏凱於朝有勅命也速迭兒守居庸之北關壘石以爲固十月己亥拜榮祿大夫知樞密院事依前兼管都府事統領諸翼蒙古軍馬使出師禦寇兵之西入者師次廣平磁州之武安縣敗獲總兵者也先帖木兒等而西南諸郡以次告平庚子召還辛丑賜白金五十兩中統鈔五十貫金織文衣二襲十一月丁亥樞密院奉勅散諸軍行院官還京師明年二月以舊官復拜山東河北蒙古軍都萬戶府都萬戶三月賜以只孫宴服只孫者貴臣見饗於天子則服之今所賜絳衣也貫大珠以飾其肩背膺間首服亦如之副以納赤思衣等七襲納赤思者縷皮傅金爲織文者也海東青鶻二五月 上之上都也速迭兒仍帥其所統兵從八月賜白金五十兩金織文衣一襲十月癸卯皇帝若曰也速迭兒屬囊鞬以備干城恪恭職事朕用嘉之其以爲河南行中書省平章政事代乞住移乞住他鎮十一月丙寅以所統兵置大都督府命兼山東北蒙古軍大都督秩從二品刻銀印賜之己巳有封贈之命嗚呼上之所以待功臣將帥寵錫榮耀不亦盛

乎臣嘗聞之自昔國家所貴有勳舊之臣者以其君臣之契深宗社之事稔逆順向背之道素定於見聞而愛敬之誠自有不能已者故其得備戎行氣決志奮以能成功也

世祖皇帝既定海內以蒙古一軍留鎮河上與民雜耕橫亘中原故將委忠信於國人備非常於他日其所以爲子孫計者深且遠矣

今上皇帝以天縱之資歷草昧之久奮名義以致討夙逆應天人而歸履大位固歷數之所在也若曹南王家自開基以來已入備禁衛出死行陣者三世矣今平章以其世守之舊兵奉中興之大業以致真王之封食所居之邑聲振大藩受軍民之寄福祿方未艾也嗚呼偉哉敢再拜稽首而爲之銘詩曰

昔在太祖受命自天聖子神孫師武用宣

世祖赫赫一是萬國帝臣孔多貴有世績忠定之興承國肇基迺執干戈迺奉鼎彝不寧方來先後奔走盡瘁殞身以昌厥後有竭桓毅益信以崇帝討王誅無往不從金氣旣衰宋亦就蹙兼弱攻昧我帥我督截彼淮浦其流湯湯蹀血以終厲我國殤克繼父祖忠宣之武天錫之功 世祖是輔肅肅南征絕江擣城左纛振旅馳追不庭

世皇御天於鑠如日式圍不遺聲教迺訖于時出師有專有分江漢

之間忠宣所軍蒙衝載兵溯江薄海列郡風靡有順無悔旋指江東  
進師合攻關柵兒嬉孰當吾鋒斬將連營覆卒盈野迺會元戎于城  
之下變變孱孱解璽入朝掠其餘疆曾不崇朝既定甌越成功來告  
命以相臣持節東道治以歲成位以序升入覲 天子龍光是承天  
子曰嘻蠢彼海裔爾相于佐帥士以濟臨涯揚舲海若弭靈天不憖  
遺亟殞將星忠宣所統國人之勇留戍羅絡齊魯梁宋鼓旗閒閒武  
帳在中既世其官又世其功今我 聖皇中興以正錫鑾在塗萬騎  
前乘誰其將之不二之臣彼壘于郊摧之為塵 聖皇賞功寶玉鷹  
馬還長其鎮為國召虎領領爾軍何以表之爾建大府都督之旗爾  
家于曹有桑有土昔公今王三世之祜豐碑烈功備書二王咨爾多  
士勸忠勿忘

高昌王世勳之碑

至順二年九月某日某甲子

皇帝若曰子有世臣帖睦兒補化自其先舉全國以歸我

太祖皇帝實贊興運動在盟府名著屬籍世績令德以勵相我國家  
至帖睦兒補化佐朕理天下為丞相為御史大夫文武忠孝厥績懋  
焉昔其父葬永昌大夫往上塚其伐石樹碑而命國史著文而刻焉



臣某頓首受 詔退而考諸高昌王世家蓋畏吾兒之地有和林山  
二水出焉曰秃忽刺曰薛靈哥一夕有天光降于樹在兩河之間國  
人卽而候之樹生癭若人妊身然自是光恆見者越九月又十日而  
癭裂得嬰兒五收養之其最穉者曰卜古可罕旣壯遂能有其民人  
土田而爲之君長傳三十餘君是爲玉倫的斤數與唐人相攻戰久  
之乃議和親以息民而罷兵於是唐以金蓮公主妻的斤之子葛勵  
的斤居和林別力跋力答言婦所居山也又有山曰天哥里干答哈  
言天靈山也南有石山曰胡力答哈言福山也唐使與相地者至其  
國曰和林之盛強以有此山盍壞其山以弱之乃告諸的斤曰旣爲  
婚媾將有求於爾其與之乎福山之石於上國無所用而唐人願見  
遂與之石大不能動唐人使烈而焚之沃以醇酢碎石而輦去國中  
鳥獸爲之悲號後七日玉倫的斤薨自是國多災異民弗安居傳位  
者數亡乃遷居交州今火州也統別失八里之地北至阿尤河南接  
酒泉東至兀敦甲石哈西臨西蕃凡居是者百七十餘載而我  
太祖皇帝龍飛於朔漠當是時巴而朮阿而忒的斤亦都護在位亦  
都護者其國王號也知天命之有歸舉國入朝

太祖嘉之妻以公主曰也立安敦待以子道列諸第五與者必那顏

征罕勉力鎖潭回回等國將部曲萬人以先啓行紀律嚴明所向克捷又從 太祖征你沙卜里征河西皆有大功薨次子玉古倫赤的斤嗣爲亦都護玉古倫赤的斤薨於馬木刺的斤嗣爲亦都護將探馬赤軍萬人從

憲宗皇帝伐宋合州攻釣魚山有功還軍火州薨至元三年

世祖皇帝命其子火赤哈兒的斤嗣爲亦都護海都帖木迭兒之亂畏吾而之民遭難解散於是有旨命亦都護收而撫之其民人在宗王近戚之境者悉遣還其部始克安輯十二年都哇卜思巴等率兵十二萬圍火州揚言曰阿只吉奧魯只諸王以三十萬之衆猶不能抗我而自潰爾敢以孤城嬰吾鋒乎亦都護曰吾聞忠臣不事二主且吾生以此城爲家死以此城爲墓終不能爾從城受圍六月不解都哇系矢以書射城中曰我亦 太祖皇帝諸孫何以不歸我且爾祖尙主矣爾能以女歸我我則休兵不能則亟攻爾其民相與言曰城中食且盡力已困都哇攻不止則淪胥而亡亦都護曰吾豈惜一女而不以救民命乎然吾終不能與之相面也以其女也立亦黑迷失別吉厚載以茵引繩墜諸城下而與之都哇解去其後入朝 上嘉其功錫以重賞妻以公主曰巴巴哈兒 定宗皇帝之女也又賜

寶鈔十二萬笏以賑其民還鎮火州屯於南哈密力之地兵力尙寡  
北方軍猝至大戰力盡遂死之子紐林的斤方幼請闕請兵北征以  
復父讎上壯其志賜金幣鉅萬妻以公主曰不魯罕 太宗皇帝之  
孫女也主薨又尙其妹曰八卜义公主有旨師出河西俟與北征大  
軍齊發遂留永昌焉會吐蕃脫思麻作亂詔以榮祿大夫平章政事  
領本部探馬赤等軍萬人鎮吐蕃宣慰司威德明信賊用斂迹其民  
以安

武宗皇帝召還嗣爲亦都護賜之金印復署其部押西護司之官

仁宗皇帝始稽故實封爲高昌王別以金印賜之設王傅之官其王  
印行諸內郡亦都護之印則行諸畏吾而之境八卜义公主薨尙主  
曰兀刺真阿難答安西王之女也領兵火州復立畏吾而城池延祐  
五年十一月廿一日薨子二人長曰帖睦兒補化次曰錢吉皆八卜  
义公主出也帖睦兒補化大德中尙公主曰朵兒只思蠻闊端太子  
孫女也至大中從父入備宿衛又事 皇太后於東朝拜中奉大夫  
大都護陞資善大夫又以資善出爲鞏昌等處都總帥達魯花赤奔  
父喪於永昌請以王爵讓其叔父欽察台不允嗣爲亦都護高昌王  
至治中與喃答失王同領甘肅諸軍且治其部泰定中召還與寬徹

不花威順王買奴宣靖王闊不花靖安王分鎮襄陽尋拜開府儀同三司湖廣行省平章政事

今上皇帝歸正大統召之至汴以左丞相留鎮湖廣時左轄相媚而害政人所弗堪至是有旨執而僂之乃更爲申救於

上曰是誠有罪然不至死再三言之得釋其不念舊惡以德量贊襄類如此天曆元年十月拜開府儀同三司上柱國錄軍國重事知樞密院事明年正月以舊官勳封拜中書左丞相三月加大子詹事十月拜御史大夫大夫之拜左相也追念先生之遺意讓其弟錢吉嗣爲亦都護高昌王臣惟高昌祖之所自出事甚神異其子孫相傳數十代至于今克治其土豈偶然哉火赤哈兒的斤百戰以從王事捐骨肉以救其民後卒死之其節義卓然如此至其子與孫再世二王盛德之報也大夫世胄貴王清慎自持戶庭之間動中禮法平易以近民正己以肅物仁義之功沛如也及其臨大政決大議憂深思遠而聲容凝重若太山然用能彌綸大經以佐成雍熙之盛所謂社稷之臣也哉表其碑曰世勳爲宜敢再拜系以詩曰

維皇 太祖建極定邦知幾先徠偉茲高昌列國率賦寶玉重器稽首受命以表誠至 太祖曰嘻天啓爾衷有附匪疏以究爾功羣鞮

介胄十千維旅以從四征斥廣疆宇從我王事靡鮮朝夕邦之世臣  
食其舊邑舊邑高敞介乎強藩爲暴突來虔劉以殘保障扞城我禦  
我備敵爲弗順我死無貳崇墉言言寇來實繁力殫守堅責我師昏  
有齊季女出女紆難義有絕愛皇用咨嘆寇退民完天子慨之輦帛  
載金悴斯漑之城郭室家旣還旣復庶其寧我皇錫之福于廬于處  
狂囂掎之矢盡衆殲執節死之維時賢嗣泣血入告請揚天威以報  
無道天子壯之俾軍於西撫爾民人授之鼓鼙有囂西羌弗靖以撓  
移節往治旋就馴擾 武皇纘武睠爾舊服節旄印綬仍護其屬乃  
稽王封在昔 仁宗旂纛舒舒刻章以庸迺卽永昌幕府斯建將星  
宵隕亦旣卽遠宰木陰陰閱歷歲時顧瞻徘徊邦人之思大夫嗣德  
克敬以讓三命彌恭世爵用享珮玉瓊瑤靖共以居躬行孝嚴服御  
不渝肅肅雝雝有察有容親親尊尊允德允功 天子還歸大義攸  
正大夫在行民信以定旣安旣寧治久告成大夫司憲百度孔明進  
見退思袞裳赤鳥敬于無虞匪泰伊惕大夫申申明哲以孚噓歆有  
懷永昌之墟 天子有詔大夫省墓勒文載碑世勳是祚維王孫子  
永言思之豈惟子孫百辟其儀之

大崇禧寺碑



昔在我

世祖皇帝膺 上天之景命承

太祖之不基混一海宇建立制度條理綱紀一出睿思以爲子孫萬世之成法者昭乎若天旋而日行也乃若崇尚佛教營治塔寺亦必弘偉殊勝足以聳神明之瞻者歷數在躬天之所命孰能違之若夫大雄妙覺之尊以其慈威定慧默相潛佑者必有其徵矣是以 累聖相承率是而行之也

今上皇帝潛邸在金陵時於其暇日登鍾山而觀之見其江山之縈迴樹藝之廣茂民庶之熙洽慨然興嘆以爲我

祖宗德澤之涵煦以至於斯也問諸邦人父老則又以爲昔有聖僧曰寶公者自梁以來委靈茲山能相我 國家之神化以覆護吾民也水旱疾疫凡有禱焉隨願輒應於是

皇上感焉鍾山之陰有石岩中虛下出流泉注入功德水乃就岩中作觀音大士象岩前構木棧虛容瞻禮者旣而又以爲未足就翫珠峯之北得高爽之福地規置大刹宮殿樓閣如自天降寶公之塔在峯上正當其前來茲山者仰而望之如見天宮於林壑之表然後聖上仁民愛物之心所以屬諸寶公者衆庶莫不知之相與踴躍而

贊歎矣鐘山之舊寺聚銅數萬斤鑄大鍾金既在鎔皇上以碧珠投之及鍾成珠不壞完好堅固宛在樂銑萬目驚覩以爲寶公之報貺焉天曆元年九月朔日臣某入見內殿親詔之曰宜加寶公號曰道林真覺慧感慈應普濟寺曰大崇禧寺汝集其勒文以記之臣集既具述其事而竊思之曰帝王之興也天與之天保之百靈受職符瑞交現此其常也金陵據東南之會山川鬼神翼扶翕張於吾君者蓋凡五年而後歸正大統

皇心之注於斯乎嗚呼累朝佛宇之盛皆臨御時爲民禱祭資用功力有司具焉今崇禧之成實在試難之日出私財以具事而雄麗若此此固生民之所以深感乎淵衷而寶公之所以顯著於禎符者也嗚呼休哉敢再拜稽首而獻銘曰

大江之南鍾山龍盤王氣潛鬱神所保完於皇聖明遵養時晦靈示奉天竦立以待春服秋高來遊來遨旂有交龍載雲在郊顧瞻原隰有稼有穡元元之生聖聖之澤民亦望之帝子實來不鄙我邦庶無苦哉維梁寶公去之千歲善福其民有引弗替皇運勃興寶有慧知奔走先後克相厥時奕奕祠宮我營我作我報無私爾感無忤吉金之良燥溼不移萬石在簾投以碧珠寶乃發祥以肅羣眎明珠不

灼彰上之賜飛龍在天臨制九圍皇心徘徊眷茲崇禧崇禧之宇永  
廣南服 天子萬年錫我民福

集慶路重建太平興國禪寺碑

昔金陵有神僧曰寶誌宋元嘉中居道林寺歷齊至梁數著靈異天  
監十三年示寂武帝感其遺言瘞諸鍾山獨龍之阜帝女永安公主  
表以浮屠因建寺曰開善至宋太平興國中太宗得誌公祕識石中  
符其國運有神降其宮親與之語蓋誌公云太宗異之號寶公曰道  
林真覺菩薩更名寺曰太平興國賜田以食其人熙寧中王丞相安  
石守金陵合諸小刹以附益之寺始大建炎燬於兵紹興中更作淳  
熙中又燬隨更作之每更作輒加宏廣曰葺月累至於我 國朝而  
規制之盛極矣至治辛酉匡廬僧守忠應請來主之禪學之士來者  
日滿其室

今上皇帝以泰定乙丑之歲正月來至於是邦而寺適災天意若曰  
其撤舊而作新之乎 皇上感焉出金幣以爲民先於是行御史臺  
與郡縣之吏皆祗若 上意始忠之治寺也時有蒲蘆之澤前見奪  
於豪家寺隸訟之累年弗決忠至讓而弗辨奪者愧而歸之人固以  
是信道之矣

皇上一風動之遠邇雲集富者効其財貧者輸其力工則致其巧農則獻其食一歲垣廡成再歲堂室具其可以名書者曰方丈曰北山閣曰經樓曰香積曰水陸堂曰白蓮堂曰伽藍堂曰大僧堂曰道林堂曰新倉院曰耆宿之舍而大佛殿鍾樓三門未成蓋有待也歲在戊辰鑄大鍾爲金數萬斤方在冶 上施寶珠投液中鍾成其欸有曰 皇帝萬歲珠宛然在其上若故識之而光彩明發不以灼毀萬目共覩歡歎如一時 上方別建佛祠於寺北今賜名曰大崇禧萬壽寺者也是年秋

皇帝歸膺大寶是爲天曆元年出詔書布德澤於天下卽命廷臣製寶公號曰道林真覺惠感慈應普濟聖師封明日以禮祠之出黃金白金重幣以賜忠俾成寺之役蠲寺田之賦賜守忠爲佛海普印曇芳禪師住持大崇禧萬壽寺兼領茲寺未幾加授大中大夫以大禪寺領兩寺如故至順元年秋御史中丞趙世安傳勅召忠入朝九月九日 上御奎章閣三藏國師吏部尙書王某以守忠入見奏對稱旨命大禧宗禪院日給廩餼賜金襴袈裟衣與青鼠之裘其弟子以教紹基等凡九人賜各有差十二月一日賜燕於聖恩寺乃詔學士臣某至榻前製文以記之俾忠歸刻諸石國師以其事示臣某如此

臣謹具載而言曰 上於金陵新作之寺二曰龍翔集慶因 潛龍之舊邸也曰崇禧萬壽廣親構之新祠也獨太平興國雖曰宋齊梁陳唐宋之遺然盡燬而復興實在

今上龍飛之日景運之玄契蓋有徵焉茲三寺者鼎立乎一都之間以同贊乎 聖天子億萬斯年之壽豈不盛哉然臣嘗竊聞 陛下之意每不欲專福于躬而欲溥濟均惠於天下故敢述萬一而銘之 銘曰

維帝受命厥有禎符天人合機不占以孚於赫 聖皇

聖武之系贊于克艱神作司契皇有萬方山川幅員釐厥下土徒御告勤顧瞻道林在江之汜翠蓋孔旄來狩來止道林有宮百靈攸宗中有神師民所敬恭土良泉甘風雨時若發祥效珍以待聖作聖作孔時動而天隨龍躍以飛神師啓之神師不言而示以兆有命方新去故以燎作而新之自我

聖皇乃被乃除乃基乃堂日月重明天光旁燭 皇心載欣萬佛降福凡我臣民息養以生飽歌煖嬉稚壯耄寧裹兵以革牛馬在野至於永久樂其休暇輓動孳殖亦遂以成幽塞苦冤各鬯而亨 聖皇之心斯佛之力銘以著之以示無極



道園學古錄卷之二十四



道園學古錄卷之二十五

應制錄五

雍虞集伯生

碑

大龍翔集慶寺碑

欽惟統聖至德誠功大文孝皇帝自金陵入正大統建元天曆以金陵爲集慶寺使傳旨行御史臺大夫阿思蘭海牙命以潛龍之舊作龍翔集慶寺云明年召中天竺住持禪師大訖於杭州授太中大夫主寺事設官隸之畫宮爲圖授吏部尙書王僧家奴往董其役斥廣其地爲民居者悉出金購之土木瓦石丹堊金碧之需財自內出不涉經費工以傭給役弗違農有司率職庀工景從響應御史中丞趙世安承稟於內行御史中丞赤釋董阿忽都海牙相繼率其屬以莅之吏敏於事民若不知材旣具期以明年正月甲子之吉迺建立焉其大殿曰大覺之殿後殿曰無量壽佛之殿居僧以致道者曰禪宗海會居其師以尊道者曰傳法正宗之堂師弟子之警發辨證者曰雷音之堂法寶之儲曰龍藏治食之處曰香積鼓鐘之宣金穀之委各有其所繚以垣廡闢以三門而佛菩薩天人之象設纓床蓋座巖飾之具華燈香樂之奉與凡所宜有者精備以稱上意焉賜姑蘇

腴田以飯其衆 上在奎章閣親詔臣某製文勒石以誌之臣聞金陵之墟自秦時望氣者嘗言有天子氣至藏金土中以鎮之其後若吳晉宋齊梁陳南唐之君長據以爲都會然皆瓜裂之餘僅克自保不足以當王氣之盛夫孰知江山盤踞之固天地藏閱之久積千餘年而有待於我

聖天子之興也不然何潛淵之來處遂飛躍之自茲見諸禎祥行事昭著之若此者乎夫太陽之升麗於天光耀熙赫高深廣袤之區生成動植之類孰不受其煦燠而其次舍之所經知天者必仰推而志之天子以四海爲家莫非 聖明之所臨鑒惟 帝運之所由起天人應合之機實在於此其可忽諸今 天子建極于中撫制萬國顧懷昔居勢隆望重非我佛世尊無量之福孰足以處乎此也茲寺之成上以承 祖宗之洪庥下以廣民庶之嘉惠 聖天子之至仁大慈垂示乎億萬斯年者於此可見矣嗚呼盛哉敢拜手稽首而述讚

曰

明明上天祚我皇國 聖祖神宗立我民極於昭 武皇懋建不續

憲章脩明民用齊飭天下爲公 仁廟受策治極而圯或數彝則乃  
瞻明哲是保是翼俾久而安弗遐以逖祝融效靈海若率職更相吉

土此維與宅吉土維何建業舊邑龍依崇丘虎立磐石昔有居者不  
稱厥德惟我 聖皇天命攸迪川寧於波田宜於穡民用孝敬神介  
景福 帝命不遲師武臣力遂開明堂受天之曆廟而祖饗郊而神  
格治功告成庶物蕃息江流湯湯經我南服中城有宮 皇所肇迹  
惟時父老載慕疇昔雲來日臨庶我心懌 皇帝曰嘻予豈汝釋維  
大覺尊寶相金色常以惠慈拯汝迷溺我卽我宮作祠奕奕照汝淨  
月沐汝甘澤汝見大雄如我來卽馬寶象寶貝金珠璧凡爲汝故我  
施毋惜無蓄無害居佛之域民庶稽首我不知識我願 天子聖壽  
萬億與佛同體住世有赫一誠報恩有永無斁

大承天護聖寺碑

惟皇上帝監觀萬方爰啓 聖神俾一遐邇時惟 天不風交厥  
太祖皇帝神武維揚作興 帝業世有濬哲秉鉞誓征粵 天  
世祖皇帝建茲民極用輯大成既有九有戢兵包甲禮脩樂宣神祇  
咸若敦一本以端統樹羣支以定分秩序有經萬世永賴  
成宗顯承法令較一我

武考受命撫軍歸纘歷服保育民物既庶既富豐亨豫大如日方中  
迨至延祐至治之間重熙累洽物大而盛弗虞愼壬間斲彝憲於是



欽天統聖至德誠功大文孝皇帝德合天人之助躬脩揖遜之節武以勘定文以宣昭忠孝率職姦慝摛伏雨暘以時年穀順成寶興於山海波不揚嘉靖寧一利澤長久頌聲交作度越古今

列聖之仁恩神靈之景貺布濩旁達湛瀆駢臻於斯時也有斂福錫民之志焉固皇極之道也乃託諸制作之宏祠享之盛予以表奉先之孝于以廣濟物之慈同仁之化不亦與天地合德矣乎天曆二年歲在己巳春 月 皇帝若曰予承宗廟之重君臨天下夙夜兢慎思所以上繼

祖宗下安民庶者不敢少置也矧予昔在冲幼

太皇太后躬保持而導迪之欲報之德亦不敢少忘也稽諸佛氏之書孝莫重於報親慈莫廣於及物而吾佛之所以陰相我 國家者豈可量哉汝太禧宗禋使月魯不花中書平章明理董阿大都留守張金界奴其爲朕度地以作梵刹稱朕心焉四月 上幸近郊觀於玉泉之陽謂侍臣曰層岡複嶽隱隆西北太湖之浸汪洋溇涵峙而東高甕山在焉旁薄扶輿固祇園之地也使太史眎之曰吉秋八月晦立隆祥總管府以領之鑄銀爲印秩正三品以臣月魯不花領府事將作臣阿麻疎爲達魯花赤國語達魯花赤官屬之長也臣金界

奴爲總管。上曰：建寺而不先正其名，民將因其地而稱之，其署題曰大承天護聖寺。又曰：寺所以嚴奉祀事而塵垢雜居，則幾乎瀆矣。買旁近地得十頃，有奇皆厚直，以予之分，賜從臣俾爲休沐之邸，侍祠而至則處焉。且命其總管府臣相大田以買之，度其歲入以爲僧食。明年，上受尊號，改元至順十月，上命太師臣燕帖木兒率百官詣寺所告諸后土之神，始命大匠治木某月日，命中書右丞臣撒迪爲隆祥總管府，達魯花赤蓋以省臣重其事也。二年四月十六日始作土功，治佛殿，基得古金銅之器於地中，多事佛之儀物，實有密契者云：寺之前殿，寘釋迦然燈彌勒文殊金剛并二大士之像。後殿寘五智如來之像，西殿度金書大藏經。

皇后之所施也。東殿度墨書大藏經，歲庚午，上所施也。又像護法神王於西室，護世天王於東室，二閣在水中，坻東曰圓通，有觀音大士像。西曰壽仁，上所御也。曰神御殿，奉。

太皇太后聖容於中，日有獻，月有薦，時有享，器用金寶，曰壽禧殿。上齋宮也。諸宿衛之舍畢具，九月，上諭臣金界奴曰：朕之建寺，非徼福以私朕躬也。昔者國家有佛祠之建，金帛穀粟一出於國之經費，受役庀徒，則民與兵官府供億，並緣爲奸，非朕意也。今茲役也，工

備其直物償其價勿使有司因得以重困吾民臣金界奴頓首受

詔而退鳩工以集事材木甃瓦丹漆設色必精必良其土宜交易得  
所稱事出備藝各奏能施無遺巧人樂効力若子趨父屬樞密儲政  
兩院臣請以所領軍就役而給錢如民則軍士亦被惠矣從之凡役  
軍四千三百人留守臣言寺有行宮 天子之所齋也嚴重不敢褻  
請以所領匠將作而給錢如兩院之兵亦從之十月十五日 上覽  
而悅之陞隆祥總管府爲隆祥使司秩從二品命太禧宗禋使臣晃  
火兒不花臣撒迪臣阿麻疎大司農臣金界奴爲之使他官與次俱  
升又作東別殿枿木別殿丈室講堂衆沙門之居會食之所碑亭并  
亭庖福庫廐門垣橋梁咸稱觀美凡規制皆圖以獻而 上親臨定  
焉 皇后出大慶禮賜白金從戶部易鈔四萬笏及割田賦之在荆  
襄者以資之三年寺大成於是召五臺山萬聖寺釋師惠印特賜榮  
祿大夫司徒主教於寺有勅命臣祖常臣集臣法洪臣惠印製文以  
刻諸碑臣等旣同奉 詔乃相與言曰惟昔有國家者祕祝不私其  
身而思錫諸民史臣書之後世誦之今

聖皇之心一出仁孝瑣瑣之祕祝詎可擬倫哉且其爲役可謂大矣  
財出內帑而不傷於外府役以備錢而不勞於近農官有專任而不

煩於有司欽惟聖上怡神穆清對時育物量準天地而一日萬幾睿  
知明達而慮周天下至若斯寺之落成也營度經始之勤治辦董正  
之任考圖政位之審其簡在帝心又有如此者豈非億萬世宗社生  
靈之福哉敢再拜稽首而獻文曰

於赫 皇祖聖神立極歷世繼承照臨維繹維我 聖皇孝思如在  
視民如傷博施廣愛具曰大雄等慈能仁導善閔惡以拯我人乃作  
大利于國西郊檐屋翬翼霧雨之交金玉寶物算同河沙曰予有祈  
世不謂多飛蓋樹幢香鬢珠網聖靈與俱來卽來享福我惠我遂我  
煦養子孫黎民均視同仰思我太母爲世遠思顧復之勤孫謀是貽  
肅肅徽音邈邈令儀眷予晤懷庶其來茲相彼流泉閣于水涘人神  
翊扶 天子至止鼓鍾鼎彝嘉樂宴喜多壽多福又多男子羣臣百  
工侃侃獻功民無勩勞府乃羨充樂石刻辭頌言讙讙億萬斯年贊  
于皇風

河圖仙壇之碑

今上皇帝以特進上卿吳公全節年七十用其師故開府儀同三司  
神德張真君故事命肖其像使宰執贊之識以明仁殿寶而寵之  
賜宴於所居崇真萬壽宮近臣百官咸與大衆合樂以饗盡日迺已

既拜賜公坐于承慶之堂召門人弟子而告之曰吾在齟齬志翔寥廓稍長學道弱冠從先師謁

世祖皇帝遂留不歸五十年間以天子之命祀名山大川東南西北轍迹咸至一遇泉石之勝輒旁皇而不可得而我父母被寵光封鄉國高年偕老時優詔使歸爲壽而我曾不能晨夕在側吾終身之不安者也今老矣爲我圖地必吾父母之塋是近庶體魄有所依焉則我之志也小子識之於是命弟子歸饒而求之明年得地於安仁縣去饒國公之墓左數百步其山曰河圖之山書以圖來公嘆曰吾昔聞諸異人云河圖八卦也今人所傳河圖蓋五位相得而各有合之圖也儒家頗駭其說然卽卦以指視先天位數吾得金吾之旨焉故宋江東謝公枋得得其說而隱去

世祖力致之在道不食數十日而神氣益完迨授以官迺化去吾受其書而藏之今得山曰河圖告我之兆久矣迺命作石壇據風氣之會將以栖神焉則又歎曰予平生以泯然無聞爲深恥每於國家政令之得失人才之當否生民之利害吉凶之先徵苟有可言者未嘗敢以外臣自詭而不盡心焉而恩賚之厚際遇之久則有非人力所能至者矣其從子集賢待制善竊知公之意錄其平生之事略已



成編會善卒公得其書而感焉乃遺書江南以告集曰吾蚤歲猶得見國朝諸大臣及宋之遺老逮其中年公卿之重士大夫之賢且仁者無一人吾不見焉覽觀四方逝者如水知心之友其文可以傳者莫若清河元復初氏而云亡亦已久矣區區之迹他日將何所托乎人生不可期相望數千里子必爲我著仙壇之記使千載之下猶或於此乎知之則亦故人之情也夫迺爲次第善之所錄以遺之云吳氏系出太伯爲吳子之國子孫散處吳楚間多以國爲氏其在番者爲番君番之吳皆宗番君矣其居安仁有龍坡居士諱岳者墓在桂溪前倉之高源其曾大父也世居壽櫟山屋於礮石之上故宋咸淳己巳有泉出東楹之礎潤液之脉理直如貫繩上升梁間達乎西楹迺生靈芝光彩映日久而不壞是歲十一月七日公生丹光盈室生七月而能言其父抱膝上因坐假寐夢神人告之曰高仙托體君家塵中不能留也四歲能誦詩七歲其叔父教之日記千言十歲從其兄遊乎仙巖之下慨然有遺世之意十三學道信州路桂溪縣龍虎山太上清正一宮之達觀堂堂之尊師李君宗老嘗有異徵得公而應焉臨川有雷空山先生者隱居種湖之上深明易老以其所學著爲成書公往師焉他從學者莫之能及也李君避舍延至雷先生

而公得以專受其業雖休沐不出每得新瓜果之屬必卽以歸獻其親無有曠闕十六度爲道士於其傳系則居何君恩榮之次 國朝

初得江南嗣漢三十六代張天師宗演入朝張公留孫在行奉 勅

留禁近始賜名上賜其後位特進開府儀同三司玄教大宗師者也

至元十四年作崇真宮以居之二十四年開府徵公至京師公辭其

親別龍坡君之墓新墓田之舍以行是年得入見二十六年奉 詔

祠南嶽二十八年奉 詔從開府徧祠嶽瀆諸山川二十九年賜崇

真宮於浙西公奉 詔宣諭江浙行省三十一年

成宗皇帝自朔方還纂大統公從開府率其屬北迎召見賜公古瑯

玉蟠螭之環一有旨設醮于上都 壽寧宮五晝夜公專主章奏

特勅命公每歲侍從行幸所司給廬帳車馬衣服廩餼著爲令元貞

元年制授公冲素崇道法師南嶽提點二年奉詔祠中嶽淮瀆南嶽

南海大德元年奉詔祠后土西嶽河瀆江瀆二年 制授冲素崇道

玄德法師大都崇真萬壽宮提點三年大上清正一宮災公奉 旨

與近侍馳驛命江浙省臣更作之公請與宮之人各以私財佐有司

之不及四年 命有司作三清殿及觀門廊廡于崇真宮設醮慶成  
上齋而臨幸賜 開府及公黃金白金重幣有差五年公奉 旨

召嗣漢三十八代張天師與材過揚州爲守臣禱旱雨至京師爲  
答刺罕丞相哈刺哈孫王禱旱又兩八年公父母年皆七十奉旨  
降御香于江南諸名山賜對衣尙尊爲其親壽于齊老之堂九  
年作崇真觀于安仁縣賜名曰萬壽崇真觀十年制授公江淮荆  
襄等處道教都提點十一年

武宗皇帝自朔方歸纂大統制授公玄教嗣師總攝江淮荆襄等  
處道教都提點崇文弘道玄德真人鑄銀爲印曰玄教嗣師之印視  
二品封其父克己翰林學士中順大夫至大元年以歲歉禁民間酒  
特勅光祿寺日有賜尊上賜公七寶金冠織金文之衣爲朝真  
之服

仁宗皇帝在東宮所賜冠與衣貴重華異如上所賜公從駕

至中都中秋賜宴上顧其貂裘敝改賜黑貂三百以爲衣縷金

文之錦以爲緣二年制授公第子夏文泳元成文正中和真人江淮

荆襄等處道教都提點賜銀印視二品三年公奉聖旨設醮于龍虎

閣皂句曲三山制贈公大父鑒昭文館大學士資善大夫追封饒

國公諡文靖祖妣陳氏封饒國夫人父翰林學士克己加授榮祿大

夫大司徒饒國公母舒氏饒國太夫人仍賜對衣上尊有旨命公

奉 贊書歸鄉榮其親因命設醮于安仁縣之崇真觀以慶成皇慶元年

仁宗皇帝命設大醮于大都南城長春宮公奉 旨投金龍玉簡于

嵩山濟瀆是年 勅翰林學士元明善脩龍虎山志著序進入改賜

崇真觀額爲崇文宮延祐元年公奉 旨設醮于龍虎閣皂句曲三

山因請歸慶其父母八十之壽對衣尙尊之賜如初是年傳 旨江

浙行省促公還 朝 制授公弟子毛穎達正德弘仁靜一真人嗣

掌遁甲之祠事 賜銀印視二品四年有旨名其鄉曰榮祿鄉里曰

具慶里降璽書護其家六年饒國公之訃至上京集賢以聞 勅翰

林侍讀學士元明善著碑文翰林學士承 旨趙孟頫書字 太子

詹事郭貫篆額給傳奔喪十一月太夫人歿十二月葬父母于其縣

崇德鄉之山田作明成觀以奉祀明年 召還京師 英宗皇帝至

治元年十二月開府張公觀化于大都崇真宮 上聞有旨歸其喪

於龍虎山百官送諸上東門外所過有司治辦舟車祭遣公請歸執

喪不許命弟子崇玄冲道明復真人陳日新薛玄義奉喪還二年

制授公特進上卿玄教大宗師崇文弘道玄德廣化真人總攝江淮

荆襄等處道教知集賢院道教事玄教大宗師玉章一一品銀印一

總攝道教事二品銀印一并授之 勅省臺百司諭以傳宗之事而大護其教用開府之制作東嶽仁聖宮於齊化門外重脩太一延福宮三年太上清宮又災公率其屬更作之泰定元年春長春掌教真人顯 上用公薦以汴梁朝元宮孫公履道主之二年公奉 旨設醮于長春宮又設醮于崇真宮護教之詔如故事 制贈饒國公光祿大夫大司徒諡文康三年奉 旨設醮于龍虎閣皂句曲三山奉 勅葬開府張公于南山之月嶠作仁靖觀以奉祀四年改造開府所建溪山真慶宮天曆改元冬公還自東京明年北迎明宗皇帝謁見之次 賜對衣上尊及歸天曆護教之詔如故事追封故開府張公曰神德真君勅改仁靖觀爲神德宮至順二年公進宋儒陸文安公九淵語錄世罕知陸氏之學是以進之有 旨設醮于長春宮公告老請以弟子夏文泳嗣玄教 詔留公三年有 旨設普天大醮于長春宮又設大醮于崇真宮元統元年

今上皇帝卽位護教之詔如故事仍改至元之元年 京師旱公奉

勅禱之雨冬無雪公奉 勅禱之雪二年公重建饒州芝山文惠

觀於永平門外遷番君之神以居之四年與神德宮明成觀皆被

壘書之賜五年畿內田有蟲螿執政請公禱之三日盡除而仙壇之



成則在六年矣 皇元初有中原五嶽之四在 天子封內既得宋而後南嶽之神得而禮焉是以

世祖特命開府張公領其祠至是屬諸公矣長沙有故宋相趙信公葵之子淇博學多識尤好神仙金丹之事有宜春李先生簡易者故玉溪李觀諸孫遇異人得丹道蓋以爲遇劉海蟾而得之淇每師問焉未盡其旨而李先生化去後遇之玉山道中始得其說既內附命爲湖南宣慰使輒欲棄官行其道憂患多故不能如其志公爲天子使南嶽道過長沙趙公見而敬焉曰神氣冲爽而有福德可以受吾道迺焚香密室出其書以授之則皆海蟾玉溪之祕云

世祖嘗曰 天子當禮五嶽而朕年高不能往每遣近臣忠信而識察者分道祠嶽瀆后土戒之曰神明之使馬不至喘汗則善矣蓋歸而問其所聞見人物道里風俗美惡歲事豐凶州縣得失莫不參伍以周知疎遠之迹焉公之連歲被 命而出每辭以爲臣不足以當大事之重 上曰敬慎通敏誰如卿者遂行他日

成宗遣嶽瀆使還顧問如

世祖故事曰卿過郡縣有善治民者乎對曰臣過洛陽太守盧摯平易無爲而民以安靖 上曰吾憶其人卽日召拜集賢學士公使過

浙西時故翰林學士閻公復爲按察使老成文學譽望甚重公時才踰弱冠議論明正閻公客之不敢忽也後閻公居翰林益加重焉

成宗旣崩

仁宗皇帝在懷孟未至而閻公典詔令有狂士危言以訐閻公事罔測公力言諸李韓公孟

仁宗意解及

武皇卽位遂以平章政事歸老高唐如

世祖待王鹿菴磐故事 朝廷得敬大臣之體不以口語傷賢者則

公深有以維持之也故翰林學士吳公澄始用董忠宣公士選薦於

朝自布衣拜翰林應奉 召至不拜去後又召爲國子監丞升司

業與時宰論不合又去公啓於集賢貴人曰吳先生大儒天下士聽

其去非朝廷美事集賢貴人聽公言超奏吳公爲直學士吳公雖不

赴而天下韙之至元大德之間重熙累洽大臣故老心腹之臣莫不

與開府有深契焉至於學問典故從容裨補有人所不能知而外庭

之君子巍冠褒衣以論唐虞之治無南北皆主於公矣若何公榮祖

張公思立王公毅高公昉賈公鈞郝公景文李公孟趙公世延曹公

鼎新敬公儼王公約王公士熙韓公從益諸執政多所諮訪閻公復

姚公燧盧公摯王公構陳公儼劉公敏中高公克恭程公鉅夫趙公孟頫張公伯純郭公貫元公明善袁公桷鄧公文原張公養浩李公道源商公琦曹公元彬王公都中諸君子雅相友善交游之賢蓋不得盡紀也薦引善良惟恐不及憂患零落惟恐不盡其推轂之力至於死生患難經理喪具不以恩怨異心則尤公之所長也公博覽羣書徧察羣藝而於道德性命之要粹如也嘗作環樞之堂畫先天諸圖于壁以玩心神明有詩曰要知顏子如愚處正是羲皇未畫前其所造蓋如此故其述作光明痛快足以見太平之盛而深存忠厚於人倫有所感發自幼至老尤好吟詠皆出其天性之自然而非有所勉強尤識爲政大體是以開府每與廷臣議論及奏對上前及於儒者之事必曰臣留孫之弟子吳全節深知儒學可備顧問是以武宗 仁宗之世嘗欲使返初服而置諸輔弼焉道家醮設之事是其職掌故於科教之方無所遺闕香火之費無所簡吝然而 朝廷耗費過重則每日事天以實不以文弭災在於脩德而禱祈特其一事爾全真之教敘其祖傳有所謂玄風慶會錄者大德中嘗使人譯之而莫達其意有 旨命公論定公曰邱真人之所以告太祖皇帝者其大槩不過以取天下之要在乎不殺治天下之要在

乎任賢脩身之要在乎清心寡欲鍊神致虛則與天地相爲長久矣  
譯者以其言奏之上大感悅不惟邱公之心事明白而

太祖皇帝聖學之淵微亦從可窺其萬一是以君子深有慨於公之  
言也公之執親喪也自奔喪至家水漿饋粥僅足以延息涕泗滂沱  
繼以血衄喪葬之後力之所得爲者無不盡其力焉墓田之域伐石  
江濱山爲洞穴掘泉下錮深廣高厚葬之日郡守王公都中親助喪  
事送葬者連數郡車馬畢至時方寒雨滂淖載途一夕北風結凍堅  
冰在地行者無苦人以爲孝思所感也明成觀有著存閣者以致其  
嚴祀之意方外之士感其孝思知慎其親之存歿自此始矣其事開  
府也先意承志周思廣慮所以事 朝廷尙道教無絲毫有所違拂  
開府泰然委之而不疑確然信之而不惑所以能有立於聖世者非  
惟運數則然而其誠心相孚亦有以致之也其葬開府於南山也饒  
信撫三郡守將以其官屬會葬江南諸名山之主者皆來勦事伐石  
題名而退擇卜之慎營繕之勞工力之博賓客之盛東南數十年間  
未有能彷彿其萬一者公之盡力於其師與所以奉其親無二矣久  
之作南山諸詩沉鬱哀慕識者讀而感焉東南道教之事大體已定  
於開府之世而艱難險阻無時見於所遭裨補扶持彌縫其闕使

夫羽衣黃冠之士得安其食飲於山林之間而不知公之心力之罄多矣公之宗系別居於達觀堂者尊顯獨隆於他支封真人者凡數十人奉被

璽書主宮觀者尤不可勝紀其姓名別有述公生平畫像之贊及大父母父母與其身之所奉被贊書及諸堂室記頌皆一時名筆別類爲書曰天爵堂類編并其所爲詩文曰看雲錄者通若干卷集賢直學士揭傒斯奉 旨作序以傳于世

皇上卽位之初親御翰墨書閑閑看雲四大字題曰賜吳上卿識以明仁殿寶 勅御史中丞馬祖常太常歐陽玄爲之贊至元六年九月初一日大駕自上京還次懷來燕坐幄殿集賢大學士不答失利等以上卿之言入奏曰御書四大字臣全節旣刻諸樂石又模勒于文梓爲四鉅榜塗以黃金周以雲龍之飾以其二賜崇文宮閣而度之請錫名曰龍章寶閣又以其賜達觀堂 先朝嘗賜玉璞命攻玉之工擬太上說經之像刻數年而後成請以歸達觀之閣而祠之請錫名曰玉像之閣而御書二榜揭諸其上矣有 勅命臣集爲之記而文惠觀河圖仙壇并命臣集銘之臣集先已記仙壇之記如右謹再拜稽首奉 詔而爲之著銘曰



嶷乎茲山厥名河圖地闢天開孰究始初則圖示卦庶聖歷述山藏  
無聞傳者周易易老之通同原殊宗或隱或彰闕在道宮有崇丹丘  
僊壇是作玄契夙符龜筮從若門人弟子作之三年天子致問有賁  
其園清靜佐理啓自神德維帝外臣歷世無斁在今宗師有爲有文  
孝親敬師致忠於君寵光道家冠代邁古白髮蒼顏長侍帝所遺老  
故臣沛然從游紀德論文金石不渝量弘智周用世何有却而不居  
有相其道天子聖明昭惠老成龍章鳳書玉質金聲有懷故鄉有棟  
有宇神明攸居山木翬舉威德孔容象其粹冲聿嚴敬共以報顯融  
有嘉豐草呦呦鳴鹿天降甘露灌濯神穀維昔廣成宅乎空同千歲  
不衰穆其清風肅肅吾壇圓方平直奇耦參兩俯仰有則脩名度方  
天子命之刻詞孔貞來者敬之



靈惠冲虛通妙真君王侍宸記

至順三年夏樂安縣尹蒲君汝霖以書來告曰在延祐庚申汝霖同知南豐州事六月州境大旱禱諸山川弗應州人言有侍宸王君祠在神龜岡所謂妙靈觀去州數里侍宸宋徽宗時歸而沒於其鄉其神至今有靈異盍禱諸汝霖以雨爲己任親往禱焉既得卜乞靈水於缶登舟以還有蜿蜒浮水而來者紅光赫然雲氣隨之州吏以器迎之既就器蟠不動及州門雨垂降至公署而大作是歲稔明年又旱吏民以汝霖前禱之應也委汝霖仍往其應如去歲歲又稔於是州之父老來告曰侍宸之恩不可不報生有道術著於時歿又惠澤及其民宜白 朝廷有以表異之南豐下州也而不統于郡得專達行省乃以侍宸事爲文書上之既聞於 朝事下太常博士議曰君故宋時已封冲虛通妙真人宜加賜靈惠易真人曰真君是時有臨川道士唐樂真以法術承應 內廷是年以侍宸教法禱兩京師有應集賢院亦上其事故 朝廷知之而得封甚速也 命既下而汝霖學製錦於樂安去南豐二百里而近增封之 命至斯所以侈上賜而係民心猶汝霖之責也公在太史幸爲書其事於石汝霖以鄉人請私焉按臨川盱江志宣和間有南豐人王文卿字予道號冲

和子生有異質嘗爲詩告其父有方外之志父歿辭母遠游渡揚子江旣濟行野澤中雨暝迷路見若有燈火者就之有老嫗爲逆旅者得文書數卷篝火讀之雨霽火絕天且明乃在大樹下無逆旅也其書蓋致雷電役鬼神之說云以是濟人甚衆各聞江湖間當是時徽宗崇尚道教嘗夢得神人以形求之得侍宸焉賜見大稱旨拜太素大夫凝神殿校籍其官道君別置道教官也大夫校籍位已尊矣賜其父承事郎封其母曰宜人京城有狐爲妖人爲立狐王廟瑤津池又有妖蓋黑鯉也奉詔劾之狐鯉皆雷擊死將有事於明堂而雨不止君禱之立霽有詔獎諭拜金門羽客自校籍升侍宸賜號冲虛通妙先生淮南北以無雪告上憂麥以告侍宸遂大雪麥熟賜金帛不受盜起山東徒黨號巨萬郡縣不能制聲勢張甚召見便殿上以爲言對曰當以神力助討他日獻捷者言天大雷雹賊乃潰而道君遂歸功於侍宸矣而侍宸實預知天數數數以脩政練兵爲請不暇聽其說乞身歸田里求去不得一日拂袖徑還南豐未幾宋南渡紹興二十三年八月二十三日爲酒食召鄉里飲別書頌條然而逝旣殮舉棺而葬之甚輕蓋尸解云神龜岡其墓也其靈異之事相傳不絕侍宸歿而能福其鄉之民蒲君去他官不忘其舊民嘗受侍宸之賜

其仁惠皆可錄故書之使邦人有所考焉予既爲前南豐倅蜀人蒲  
汝霖著侍宸王真君碑後六年爲至元庚辰十月上清外史薛雲卿  
以書來告曰有番陽胡道玄先生人間所謂神霄野客者也得侍宸  
之真傳年二十餘道行關陝荆襄江漢淮海閩浙之間當己巳庚午  
之旱旬日之中郡縣爭致之所歷或一日或二日嘻笑怒罵雷雨隨  
至官吏畏而民愛之環四五千里之間所至無不應者至於妖怪之  
作劾治如法人以爲神遇異人於武當山頂天柱峯得修仙之道徧  
游名山洞府而歸江東西之間從蓬頭金公遊甚相契許他人莫之  
測也於是收斂神異之迹將求各地以歸隱是以謁浮邱君於華蓋  
之上道過黃茅之岡故使予得見焉既見則爲余言曰神龜岡碑所  
載事有未備者請述之云昔侍宸自南豐辭親而至揚子也所遇而  
得書者火師也火師者蓋上古神人而世傳爲汪氏子華者蓋其化  
現爾其囑侍宸之言有曰吾身一天地天地一陰陽握其機者在我  
而已子當以是應玄徵佐明主吾待子於神霄之上矣侍宸退而修  
諸其鄉軍峯之陽所坐磐石猶在及事道君皇帝位至侍宸道官之  
尊貴與文官侍從等其後又遷冲虛大夫賜金方符使印以入禁衛  
加贈其父曰承議郎母曰令君宮中人多病者上以問侍宸侍宸曰



此有物怪爾當劾之坐未退天忽晦冥雷電交作頃之霽一白龜甚  
大震死矣病者皆起揚州守臣以旱告禱雨不應道君以問侍宸對  
曰下民多罪上帝震怒水不可得道君強之侍宸曰無已惟黃河  
水可借三尺耳數日揚州使至奏得雨皆泥潦計其時乃奏對之日  
也侍宸既以國亡妖孽爲奏不見聽而還上思之畫其像而親爲之  
贊既居鄉鄉里無水旱疫癘妖怪之事千百里間雖亂離而帖然高  
宗定都江南將二十餘年聞侍宸猶在命守臣物色之有詔曰勅王  
文卿先朝高士退隱林泉枕石漱流多歷年載兵戈之後杳不聞音  
朕甚思之其出山一來以副虛佇又勅守臣以禮遣發辭以老病不  
復至闕使人畫其像以進亦親題贊世人多傳之歿既久侍宸之從  
孫以貧從商人入蜀親見侍宸於道中弗識也執手江澣多所傳授  
曰明日渡江某觀中可相尋也明日至其觀悄然無人入一高堂中  
有畫像則侍宸之祠也始知其所遇傳授者乃其大父也及明日又  
遇之以幅紙與之曰此孫至家上官甥以吾書盡授之妙濟歸告上  
官上官弗信出其書視之上官識其手蹟號慟仆地盡以教之際遇  
寧宗朝法亦大顯賜號妙濟先生名嗣文蓋妙濟初年不甚識字嗣  
文亦侍宸江澣所命也又有薩守堅者亦酷好道見侍宸於青城山

而盡得神祕游東南禱祈効治其神怪有過於侍宸者游江西入閩過神龜岡乃知侍宸爲數十年前人云昔侍宸在汴京居宮觀見爲黃冠者多詔事權貴以自銜惡之故多不得其說其在鄉旣老而得其傳者則新城高子羽授之臨江徐次舉以次至金溪聶天錫其後得其傳而最顯者曰臨川譚悟真云人不敢稱其名但謂之譚五雷內附後譚君猶在浮沉人間隱顯莫測廬陵有羅虛舟者故宋時名士澗谷先生之諸孫也得五雷之傳甚有符契然譚君誦侍宸之戒曰每傳不過一二人若廣傳之則速死是以羅之弟子雖多而自以爲得之者惟蕭主簿兩軒其後則有周司令立禮兩人而已周與予有姻眷然終日言之未嘗及此蕭君清文雅學中懼憂患然甚通至理泊然無所累其心予敬愛之而未嘗言及之也周之說惟授之其子游其門者或得或不得予不知也蕭君儒者擇人至謹而人亦不知其有此道獨傳之道玄胡君一人而已神異之事已見於前其客於予者頂分三髻一劍自隨練衣短裙危坐終日風雪極寒之夜燈火不繼而溫煦滿室目神炯然神觀洞徹縱橫自在物外無拘而剛介不可犯也此亦真修仙者乎有侍宸手書詩一首蓋譚羅相傳之符契也且曰吾將隱矣當求人而付之必也戒行若冰霜立志如

鐵石胸次如水月氣象如陽春又雖生尊貴之家而世有陰德學乎清靜之門而身有福力者則以授之果爾其亦難得也哉雍虞集記

道園學古錄卷之二十五

道園學古錄卷之二十六

應制錄六

雍 虞 集 伯生

供醮文

水陸會功德偈文

我 國家

聖聖相承深仁厚澤浹於人心累洽重熙多歷年所

今上皇帝濬哲文明纂承大業好生之德已洋溢於萬方恭己之誠

思貫通乎上下海涵春育無間幽明雨順風調大同遠邇 聖恩

盛大蔑以加矣而萬幾之密猶垂念於隱微九有之師或未該乎冥

邈勝脩法會式究淵衷乃脩水陸冥陽大齋于萬壽寺自三月一日

啓建七日滿散乘法寶之威光成金心之願力旛蓋香華種種妙饌

齋儀梵唄一一圓成凡我佛子昔自多生歷酬定業或以刀兵水火

或以疾難飢荒沉迷五濁之惡塗未返一真之本性遇良因於今日

得勝妙之現前渴饑並獲於清源苦惱悉超於極樂來生佛土祇奉

明時回向善提增崇

聖壽臣等迺稽首而作偈曰

聖上運大慈憫諸有情等作此大勝會供養佛法僧勇識妙蓮華諸

大阿羅漢畢支迦五明金剛大威德護法諸龍天凡在虛空界敬禮等無二開闢諸方隅光明悉照耀迺至諸明哲往昔善持世四生及六道凡在苦趣者悉皆承佛力來赴於道場心花得發明諸識轉爲智一切現苦業消滅無復續巍巍大功德皆由 聖心起我聞昔有人積寶如須彌持施得福多恆河沙難喻我皇勝妙因福報不思議視彼施寶者千萬不及一我等佛子衆各生慚愧感稽首贊吾皇聖壽千萬歲與佛共悠久

水陸會緣起文

原夫一靈圓妙本不昧於昏迷歷劫無明遂有淪於流轉我佛興大憫念開方便門譬彼宵征遠道冥行荆棘之林我以慧炬照之則前進無殊於白晝又如往濟大川忽遇風濤之險我以慈航渡之則安行無異於陸途施平等於無方悉蒙揀度嗟幽沉之有苦尤切哀矜於是文殊感定業而生悲觀音幻化身而啓教十方諸佛共弘應供之名六道四生亦攝菩提之海大士仰承於佛勅道場肇建於當年孤峯接雲海之空明白日映江潭之澄澈神靈交會凡聖混融分八位上下之殊作萬劫圓通之施傳流既久證驗尤多我今上皇帝與佛同心如天之覆念生成之類已在於鈞陶而冥邈之



蹤尙迷於出沒迺鑒人天之意大脩水陸之儀爰命國師俾提法要  
迺以三月一日於大都萬壽寺脩建水陸無遮法會七晝夜上資善  
逝之恩光下拯孤魂之陰昧香積普熏於世界盡斷惡緣妙蓮應現  
於池中悉離苦網咸來佛會共沐 帝恩逍遙極樂之鄉不墜輪迴  
之境共報 聖明君乃說偈以贊曰  
一切衆生皆具佛性如摩尼珠五色隨映如何累劫業識相因無明  
展轉生死根塵我佛慈悲施方便力如大醫王救彼痼疾餓者令飽  
渴者與漿幽闇與明熱惱與涼况爾六道諸苦隨業不藉佛恩何由  
自潔 聖皇在上運大仁心樹旛慧幢立功德林作此道場期七晝  
夜平等無礙均一高下光明圓滿如佛現前孤幽沉魂懽喜慶筵如  
是勝因增崇聖壽億千萬年堅固悠久

建國醮建壇青詞

荷天洪休膺國大統肇惟元祀奉若明禋殊庭修祕祝之嚴肅拜候  
景光之集伏願環紫壇之納陛闢黃道於崇霄天極旋樞日星炳曜  
后祇薦祉川岳闡珍用期泰定之民均被豐成之賜

朝詞

聖祚在躬肇啓乾元之歲道宮修禮丕昭答貺之誠禱以再三鑒茲

精一伏願乾元統御坤道順承時對春陽導本支之鬯達紀增神策  
保宗社之奠安遂以生成均陶動植

三清

荷天地之洪休晉承繼序奉祖宗之成憲思究彌綸期敬達於丹誠  
惟謹資於玄教肅將蠲潔用極依歸伏願慶衍中朝仁儲大本休明  
佑啓百神受職以安寧福祚延洪萬世奉天而長久

昊天

入膺丕緒有命自天載省眇躬無疆惟恤啓淵衷之至實感真貺於  
太虛伏念比屬盛時俄慨堅冰之漸致永懷讓德不忘暵日之初心  
迺正誼以廓清期與民而寧一用發憂兢之慮悉紓對越之恭伏願  
乾御陽剛坤成地道祖宗陟降同保佑於高明家國治平丕顯承寧  
於悠久

后土

集基命於眇冲始建初元之紀覽幅員之廣表益思大業之興祗若  
寶圖誕敷金籙伏願玄功有造至德無爲道致謹於順承協成泰定  
物資生於厚載保合乾剛

醮星祝文

太陽

赫赫太陽秉陽之精照臨天下達我皇明克循克軌永底隆平

太歲

翼翼倉龍集于巽維紀綱百神運行四時相我君道壽我皇基

歲后

於赫歲陽配于陰宮承于大君內治之宗以生以成登我歲功

金星

奕奕長庚煌煌啟明主我兵事宜順其經弗僭弗忒邦家以寧

太陰

明明太陰配陽麗天主國之刑勿忒其躔以順以寧于以永年

室宿

惟乾之維是爲營室炳燿定中景命有翊廣開天門相我無斃

天剛

龍角在田帝車所持聖人之生次舍在斯攝提衆星萬壽是基

病符

歲德所紀主病有符視其侵祥傍射在隅於赫景命靈其袂除

大耗

歲有癘神耗之大者集于乾隅衡照辰舍乃謹祓除勿害純嘏

土星

煌煌鎮星位于中宮行地無疆承天之功用集嘉福懿範是崇

小吉

鶉首之舍月后所臨東井洋洋景耀昭森扶我元懿萬福來歆

喪門

左挾丁符右接坤隅孰敢啓門當我吉居祈祓不祥以寧皇輿

金星

太白之精其神孔武憶我南西孰被孰禦宜斂其芒勿閒多祜

九月十四日高昌王大夫傳

旨作醮星文

元辰天罡

於惟聖皇受命于天斗車提綱龍見天田萬物振羨威信是宣以介

景福樂只萬年

羅喉

赫赫有威惟天之首日月之行交道豐蔀烜兮照臨景命先復克相

有道天子萬壽

室宿

熒熒營室天之玄宮以藏以息肅肅雝雝乃瞻元台惟茲是從錫福  
未央如定方中

小吉元辰

位南以西爰卽于坤東井洋洋有漑其源肅肅中宮景命在垣元吉  
之福既昌以蕃

太陽

赫赫太陽日躋于乾順德維坤承暉弗愆昭光播和若春在暄萬福  
來臨與天齊年

參宿

載瞻參墟明星煌煌乃占其書孝謹忠良肅肅中宮景命溥將儷于  
聖明既壽永昌

太充元辰

有巖太衝維震之宮青陽載熙木德乃通時維聖子景命是逢導之  
太和被之仁風

太陽

日之行天至尊以光誰其承之維青之陽輝輝煌煌繼照四方星輝



月輪永保無疆

斗宿

斗爲天機日月耀芒酌量政事褒進賢良於維聖子元台是當錫福自天欣欣樂康

太陽

東望扶桑赫乎九芒下被萬物麗天爲章東賓西饒靡朝敢忘錫我景福於昭輝煌

太白

肅將金行司天之刑順軌出入厥有常經掠於軒轅占者以告敬恭用祭景福來報

軒轅

粲粲軒轅黃龍之體屬于內廷占者所紀長庚來于非順之軌載祭載禳轉作多祉

太陰

占象于坎受陽以光配於大明流輝四方天清地寧軌道有常介我景福萬壽無疆

太歲

歲維昭陽辰在協洽神君所臨萬靈來合皇皇景祚奉德秉法我將我享嘉佑斯答

白虎

於菟眈眈爲兌之神爲素爲刑莫之敢嬰迎祭于西爲禮孔殷神其食之介福來臻

大耗

滿盈之過神則害兮從而虛之孰可賴兮占歲之行厥有恆所尙易其嗇豐我多嘏

迎神

肅肅靈臺二光下臨旨酒牲牢嘉幣吉金肅將祀事罔敢不欽赫赫洋洋神其來歆

送神

靈臺有享神其來格其祥如雲其近如日嘉禮告成景貺秩秩相我寶祚於萬千億

又醮星祝文

迎神

肅肅清臺曆象是司維天有神維土有祇爰潔牲幣以禱以祈歲祀

奉迎靈其鑒之

太陽

出乎暘谷升乎扶桑麗于天中照臨下方愛而燠煦畏而蒼涼戚畹  
有禱降福穰穰

太歲

煌煌明堂歲君攸居位于鶉首殿乎坤闈東井洋洋土德之基錫我  
嘉福順我禱祈

歲后

歲德至尊歲后配之黃裳元吉象服是宜理其內教以佐無爲沁園  
有禱卻除病蓄

勝光

陰之始生實自於午於卦爲姤柔順斯主皇有懿戚元辰麗焉是用  
禱祠惠我安痊

土星

中黃正炁維土之神神氣上騰煌煌向晨元辰有宮其光來燭鑒于  
戚邸悉茲多福

婁宿

維主之生誕彌其月遡其元胎在魁之揭其宿維婁光耀燁燁除我疾疢安康毋越

病符

六氣不齊庶疾乃生誰其司之有神孔明執其靈符以佐歲行禱以嘉薦惠我安寧

金神

五行之中金主肅殺有神孔威司是嚴伐歲行遇之伊怒孰遏享我忱禱毋敢凌越

災殺

沴氣所生曰能致災以殺爲名不亦暴哉和以嘉醑柔以嘉脯順而好生永錫多祜

喪門

白馬素車人實忌之孰啓其門有神蒞之上帝好生爾獨何爲攝而憺心安我戚聞

五鬼

五氣之歸其名爲鬼絀而弗伸有繁厥類載以酒漿道以車船旣享而除勿爲禍愆

青龍

星有角尾其象維龍蜿蜿蜒蜒東方之宮木德司春為善為仁永錫  
嘉祥百祿是臻

白虎

昂畢之上其象維虎有虓其武在西之滸金德是司為義為刑尚斂  
其威疾疾用寧

送神

陽主于德陰主于刑刑斂德揚陟降在庭既享既歆以安以順神還  
應遲福以時進

又醮星祝文

迎神

欽若昊天觀象知倣爰即靈臺秩祀惟謹大庖既享大尊既盈神其  
格思來享克誠

太陽

東望扶桑赫曦來升羣陰既伏萬國咸承朝賓暘谷彝禮斯在齋宮  
告誠綏祿萬載

太歲



煌煌歲君臨於端門有烜朱方歲德攸存當離之明如日斯赫降爾嘉祥以輔有德

天罡

蒼龍之墟左爲天田神蛟應龍景命所躔斗爲帝車惟剛是指相我有道來錫繁祉

小吉

維鷄之首土德是毓是爲吉神厚德嘉福宮壺嚴嚴景命所臨徽柔懿恭式薦其欽

功曹

寅爲人統其方析津肅肅青宮盛德惟仁煜煜箕尾保我景命克長克安以輔明聖

歲星

盛德至仁所主爲歲長養生成福祿攸系煌煌景光臨照有方一人以寧萬國彌昌

羅喉

明離有神維南是司承其餘光劍戟孔威其威孔揚其福亦厚來降來享作我嘉祐

太陽

明兩作離繼照四方赫其有輝照我青陽青陽有煒百福來委俾熾  
俾昌以承天子

太衝

木德之盛次於震方至仁應規以佐青陽迺錫嘉福以暢元氣帝后  
萬年本支百世

太白

長庚之精司兵司刑燁燁其輝輔日而行斂爾光芒順爾軌度以安  
以寧佐我昌祚

熒惑

赫赫炎炎揚光於天孰當其鋒奮烈莫前維國有道宜順軌則順行  
為福以相有德

歲后

黃裳元吉以順為則佐於歲君豐阜民物靈臺有祠敬恭禱祈陰陽  
理和百福是宜

青龍

東方蒼龍至仁至靈角尾之間赫乎明庭青旂蒼玉禮祠維肅蜿蜿

蜿蜒來降景福

白虎

兌為白虎至雄至武其德為金威怒孰禦白旂素車象德以旂風其從之百祿是宜

送神

成象於天降靈於地國有令儀克致禱祀禱祀敬恭神歸匪遲天子萬年福履綏之

金籙普天大醮青詞

建齋詞

纘述不圖恪奉 祖宗之訓導迎景貺永綏家國之基冀輯福于眇躬暨息齋于中壺垂象每懷於示儆祈年尤切於好生伏願慶衍宸闡祚隆繼嗣乾和保合三光全而寒暑平坤厚順寧五穀熟而民人育

祈嗣密表

祇荷鴻休肆膺神器念 祖宗之付托思民社之依歸重惟繼嗣之隆實繫本根之固敢嚴祕祝用格高穹伏願錫祚慶圖申受上天之貺儲祥寶系益崇萬世之基

皇后保安密表

寅奉上穹申言中壺克相憂勤之念每嬰疾疢之虞冀導嘉祥用綏福履伏願高宸鑒格正氣宣通天清地寧保大和而合德家齊國治均厚福以資生

建壇詞

奉丕基以臨萬國于今有年類上帝而徧羣神肇修祕祝仰輯溥天之慶俯將率土之誠紫壇森列於人文丹闕昭回於象緯伏願天垂甘露地發醴泉靈風受職以周旋道氣成章而邇達永符至順孚佑皇元

第一日早朝祭皇天后土三界萬靈上資宗祧先聖凝神沖漠垂祐邦家祝延睿算保固不圖中閭齊年本支繁衍月律應時卦極正陽之盛天根開景氣升清旦之初通變闔於雷風妙流行於山澤均承主宰咸赴禱祈伏願

聖祖神宗陟降洋洋而在上皇天后土卑高秩秩以分儀迺發禎符用隆寶曆延齡維永尙期媿德之同錫慶有輝更應多男之祝

午朝祭日月星宿祈日月齊明星辰順度

離爲日坎爲月瞻陰陽交易之機天應星地應潮察上下盈虛之候

儼宸居之伊邇望晷景之方中敷宣藻笈之文朝步琅霄之境伏願  
赫曦繼照煌煌旁燭於萬方素曜並明肅肅順行於九道帝車臨制  
四序順成雲漢爲章五緯咸若副此乾乾之兢惕錫予郁郁之嘉祥  
晚朝祭五嶽名山祈社稷奠安宗藩輯睦風俗醇厚百辟  
忠貞

覩符瑞而告功升中斯在出雲雨而及物望秩攸崇巖巖民庶之具  
瞻肅肅天真之下治卽祕祠而用幣及初夕以飛章伏願方嶽奠封  
靈祇受職宗藩輯睦永綏磐石之安風俗清淳長被喬雲之覆  
第二日早朝祭聖帝明王先農后稷消禳水旱蟲蝗祈五  
穀豐稔民物阜康

繼天立極亶惟上帝之聖神開物導民實贊無爲之化育道秉機緘  
之祕教興衣食之餘功敘九歌業隆萬世藉白茅而明薦望素履於  
虛皇伏願無聲無臭以作孚鑒此小心之昭事不識不知而順則密  
符大德之好生民風馴致於雍熙國祚誕膺於長久

午朝祭風雲雷雨祈風調雨順寒暑應時

鼓以雷霆潤以風雨彌綸功用之神求諸形體原諸性情主宰玄元  
之造觀萬物散殊之迹知兩間磅礴之仁無爲而成有相之道日麗



端門之景雲開秘笈之科伏願天德潛符歲功咸遂九農百穀無旱  
乾水溢之虞四海羣生享安靜和平之福庶釋憂於宵旰用和惠於  
春秋

晚朝祭四海四瀆祈山川定位海宇清寧

一元合氣乘風澤於洞虛百谷來王出淵泉於溥博首五行而善利  
潤萬物以資生貨殖用興舟楫以濟稽古玄圭之錫沈茲蒼璧之章  
伏願地平天成府修事治玉書保運制衝潰之洪波寶穡宜年動滿  
盈之甘澤民安居於樂土國養德於長源漸被所同旁礪無外

第三日早朝祭三洞四輔經籙傳教宗師祈百神效職臣

鄰忠孝國祚延長

太元結氣冥思浩劫之初妙有垂芒朝徹延康之上參贊化工於物  
始傳流神寶於人閒保昌運以長存握真符而不宰將輯簡穰之福  
茂陳訪落之篇伏願乾曆開天坤珍闡地種民在宥颺言清靜之風  
景命溥將相協玄同之造忠言彙進道德彌光

午朝祭左社右稷城隍社令祀典神祇祈民樂太平物無

疵癘兵寢刑措疫癘潛銷

泰社之土五色重嘉穀之屢豐方澤之樂八成致幽祇之畢出帝命

作九圍之式神靈會萬國之封力扶玉局之安寅奉璇霄之降伏願  
泰階昭晰坤道順寧物阜民康無疵癘札瘥之害兵寢刑措皆生聚  
教養之時以至永年並依玄造

晚朝祭九壘土皇幽陰主宰資度忠臣義士兵死橫亡六  
道四生俱登道岸

禮樂鬼神信顯幽之一致生成變化知闔闢之無私卽昭明焄蒿之  
間布風雨霜露之教三光攸燭九夜斯煌伏願帝命下招天陽來復  
玉袍犀甲禮余忠義之魂瓊簡羽章起厥幽沈之趣羣類並躋於道  
岸泰和庶協於明時

散壇

五時列祠燁燁紫壇之燿火九宮飛步雍雍碧落之空歌備成絳節  
之朝敷散瑤華之景玄科有誠至敬無文伏願陟降在茲達玄黃之  
玉氣福祿來下生丹碧之芝英普與羣生恭承嘉惠

設醮詞

三清

奉承寶位對太上之顯光保佑眇躬罄淵衷而忱禱肅清璿館修設  
金科伏願元氣絪縕真風舒鬯室家祚胤膺福壽以咸宜宗社臣民

荷禎祥而均慶

玉帝

維天與祖宗既全畀付自身而家國悉有禱祈爰啓真科用于洪造伏願鑒觀儆懼孚佑眇冲保和宮壺之安錫羨本支之盛至于臣庶共樂生成

星主

星環次舍仰瞻天極之尊氣幹陰陽妙宰帝車之運景光來下祕祝用陳伏願司命紫微自中宮而錫福儲祥寶系率下土以蒙休

天皇

坤拱神圖妙秉萬幾之會坐臨華蓋旁分六甲之司戴祀殊庭承禧穹宇伏願抱極樞而環照皆占至順之祥奉天一以尊居增授泰元之英

后土

奉若柔祇配皇天而立極統臨廣寓宅吉土以升中爲國有新維靈斯答伏願羣生成遂九有奠安玄乙親祠綏保徽音之嗣黃流用裸燕貽翼子之謀

至順二年十二月二十三日祭星常國公奉

旨命撰祝文

迎神

灝灝圓穹三光昭明四方八維柔祗利貞蜡通百禋歲事告成犧尊多儀來享克誠

天剛

天眷萬方篤生聖明受命溥將攝提建貞天田之上左角所經蒼龍致福萬歲咸寧

羅喉

受天明命百靈翊扶旁燭有光赤燦之餘首乎天經形隱弗舒戢爾矛戟迎祥帝居

室宿

河有天源木貴天根帝命降祉元台為尊定之方中煌煌焯焯推而祀之萬福之門

弔客

昊天成命如日斯照運行推移載占其小有客冠素適據隅兆祝而祓之易號以笑

小吉

乾以天健坤以地厚鶉首之墟土德孔阜肅肅中宮元命昭祐六五黃裳元吉之繇

太陽

日以像君月以像后陰承陽輝萬福備有晨光熺融晝景煥明以壽以安以生以成

參宿

參墟耀靈土德長生胎息其和發爲滋榮正位居體西南利貞培本長源萬福來成

金神

中宮土德位南之西太白流英挾威以躋雄毅肅嚴戈鋌利犀尙革而從降福孔皆

太衝

煜煜青陽震雷之門玉兔肖類蒼龍儲恩帝冑天錫景命翊元東望孔祠扶桑載暎

太陽

肅肅紫微前星有輝上承天光仰接日儀煦煦爲春明明在時陽德粹純品物咸熙



斗宿

星回于紀斗臨漢潢璧合珠聯三辰齊光震夙元台肇此青陽司中  
有神源深流長

白虎

木性東榮金行兌勝刑德之交史謹其徵於菟眈眈負隅若闖率義  
從仁祈報斯稱

病符

六氣之邪孰執其契歲行神從臨午之位青陽占運適與之值祝以  
移情安和允濟

太陽

靈臺有祀報本主日仰瞻陽光步我神睿歲周星回天序有秩牲幣  
敬共嘉惠申錫

太歲

日月光周成我歲功百神具來羣蜡畢通明堂巖巖威德容容享我  
報祈以興嗣豐

青龍

龍有天德維木之仁大明生東獻歲發春時而淵潛時而奮申施惠

自天至于庶民

歲后

赫若歲陽其配在陰以肅內治以保中臨丁女癸妃其從如林通幽  
達微鑒德以歆

送神

神來如雲神惠如雨彌天映日惠澤周普歲行維新秩祀咸舉相于  
皇明永作神主

黃籙溥天大醮清詞

建壇詞

歷念先朝悵神游之日遠言修祕祝導靈氣之時升闢玄景以通誠  
建紫壇而經始伏願懸珠空境扶玉方輿風馬雲車順陰陽而陟降  
龍章鳳篆舉幽顯以鈞陶

第一朝回薦皇朝宗廟

列聖神儀

肅肅在廟永懷弓劍之遺濯濯厥靈凜若羹牆之見爰資神筭用導  
英儀伏願 列聖齊臨萬真環拱寅賓出日返往駕於中天妙合迴  
風發化機於厚地

第二朝回薦

扎牙篤皇帝

企仰山陵想音容而永慕顧瞻霜露感時序以增哀爰卽紫壇冀迴  
玄馭伏願天健其行而無息日窮于次而又新神氣昭明式慰臣民  
之望景光旋復更貽胤祚之安

第三朝回薦皇親國戚一切靈儀

藩屏國家實屬本支之盛沈淪泉壤每傷幽顯之殊邈璇宇之流光  
迴銀潢之逝水伏願會朝絳闕受鍊朱陵在河嶽在星辰還復生民  
之始爲支庶爲藩屏永承丕祚之隆

第四朝回薦后妃公主嬪御靈儀

褱綸在御歷思儷極之尊車服充庭徧念穠華之感慨生存之弗永  
致薦悼以惟勤伏願施德自天資生繇地性靈不昧釋然幽滯之懷  
運祚無疆仍會聖明之樂

第五朝普薦勳臣宰輔文武官僚

追懷神聖修殷薦於曾霄爰念臣鄰載忠魂於厚壤俾偕膺於金籙  
庶仍從於瓊輿伏願受日之光承天之佑圭璋濟濟眡王國以並生  
祀典昭昭秉民彝而不昧

第六朝普度兵刑橫死男女衆魂

內脩外攘寧免兵刑之用上征下暴更深泉壤之悲拯無告於重陰  
實有資於大造伏願天光旁燭地氣昭升斷者續死者生頓釋幽關  
之故想病者愈憂者樂永爲化國之新民

第七朝普度普天率土兆姓羣生苦爽窮魂幽靈等衆

國家每念於生靈則脩治道體魄或淪於苦趣更轉化機啓勝會於  
今晨廓迷塗之宿業伏願陽開陰闔天施地生執籙把符仰至真而  
得度葆和正性囿大化以長年

第八朝專爲和安天地調順陰陽保國寧家康民阜物

存順沒寧極幽明而無憾往禪來續妙化育於不窮宣金籙之玄文  
保蘿圖之景運伏願乾坤毓德日月垂光列聖在天共敷恩於祚胤  
一人有慶永錫福於臣民

第九朝昭謝皇天后土岳瀆山川陰陽主宰

天佑邦家總基圖於九有日臨海宇妙樞紐於羣生仰三景之高居  
罄一忱而昭謝伏願降年有永錫福無疆凡在臣鄰咸保忠貞之節  
庶幾民物常依道德之光

解壇詞

肅肅紫壇既備九朝之禮煌煌金籙益增列聖之光熙事告成誠心孚格伏願神隨天運福被坤輿瑞日祥雲常麗曾霄之景太山磐石永隆萬世之基

設醮詞

三清

天眷基圖列聖繼守成之緒時因曆數先皇成厭代之期敢緣追遠之初心普致闡幽之忱禱伏願開明三景訪落五文九轉成真既備生神之妙百靈交鬯復還象帝之初仍錫壽祺并祈康阜

玉帝

昔扣玄穹導近親之神識遄臨素幄致大寶於嗣君乃陳祕籙之科溥濟幽關之趣伏願昭宣天德旋復氣機陟降帝傍九族逍遙於金闕經綸宇內羣生成遂於縣圖申錫長年永依妙道

后土

基圖鞏固每資厚載之功體魄歸藏謹候昭升之氣降璇宮而來享鑒金籙之敷宣伏願效法成能資生有道超神太極齊日月於中天合景至陽綏子孫於下地

東極



先皇厭代因軫念於幽局上帝好生爰禱祈於東極冀瑞光之遠速  
引羣識以俱超伏願甘露騫林慈雲就日丹輦寶蓋並從妙道以高  
居玉曆金符永鎮生民之極樂

風伯祝文

東朝有命祇肅元壇上帝鑒臨萬靈率職咨爾風伯塵路惟清戢暴  
扇和熙事用成急急如律令

雨師祝文

咨爾雨師灑道是司和陽散陰相成祝釐

皇后修設黃籙大齋齋意

言念宗親將薦誠於既遠遽罹大故屬在疚之方深肆嗣皇繼序之  
新申前日籲天之實普超幽爽咸濟生靈伏願道妙無方真游如在  
升九霄之神氣衍億載之昌圖凡囿化工並承德施

正薦位白文

言念先朝 列聖帝室懿親蚤遺體魄於人間思導神明於天上鼎  
湖弓墮俄興臣妾之悲丹闕禮成既得基圖之托及燕休於長樂申  
祈禱於太清惕然霜露之寒恍若風雲之會龍儀虎衛陽光照灼於  
朱陵貝闕珠宮明水激揚於東井願金支之並濯與玉氣以俱升穆

穆乎秉德以肅雍洋洋乎在帝之左右輯和九族驩娛還若於生存  
旋歷曾霄感爽頓忘於凝滯返至真而無外與造化以爲徒况王政  
施仁必先無告而大鈞播物何間有生更推滄海之餘波徧及幽關  
之苦趣妙機所運道化同超明則復爲人亦我聖神之賜歟而錫之  
福庶乎寬大之恩嘉與明時共躋壽域惟天地日月合德合明保子  
孫黎民能安能久

### 孤魂榜

生死者晝夜之常汝勿認昭昭靈靈之識坎離者乾坤之用吾以開  
生生化化之基茲者清朝稟承慈極尊尊而思逮於凡下親親而念  
及於幽遐導揚 列聖之法筵普惠重泉之苦趣如茲良會實號希  
逢汝孤魂等昔受天地之降衷其初皆善各累形氣而逐物以妄爲  
常貪者徇財烈者徇名忿則如山慾則如澤極沈淪而愈降恣飄蕩  
以忘歸因根接塵隨境生解爲寒冰爲湯火皆其一念之差爲鬼蜮  
爲豺狼遂入萬殊之變原其名數何可歷陳我是以廣太上之好生  
推妙嚴之濟衆酌黃華於東井蕩爾形骸耀丹冶於南宮陶其靈質  
宿業不存於故想化機更造於新成不溺不焦爾可以見本真之不  
昧能流能炤爾可以驗道氣之常行承茲三景之開明卽詣諸天而

受度更無退轉並樂超升

正三門

華蓋北瞻天帝座蓬萊東擁道家山

啓玄殿

只尺天光開玉府萬重道氣見金容

正薦位

雙鳳駕雲開輦路羣龍環日護天香

總真殿

春當霄漢三台貴朝步星辰四輔尊

萬法宗壇門

綠章封奏通三景絳節趨朝引萬神

殿後西門

玉殿受釐春意滿竹宮拜祝景星明

北斗殿

慶雲郁穆承天闕景緯昭回共斗樞

殿後東門

仙音縹緲鸞凰合神衛森嚴虎豹間

景曜殿

三光合景扶元氣五緯齊明報德星

寥陽殿

五文結篆間天極九氣生神象帝先

朱陵府

九華曲蓋迎司命七寶芳林主好生

齋廚

金鼎蟠龍甘露溢玉芝成象大庖盈

齋堂

報聞千歲蟠桃熟約取九霄飛佩來

菱郭

莫就此間存活計便教向上得光明

祭風伯文

維風有神在巽之位地附天而不墜持舉於中陽旋陰而時行扶搖  
直上今則至尊有禱上帝來臨伏願宣靈氣於八門穹祗翕合卻飛  
塵於九地宇宙廓清

祭雨師文

恭承帝命祗祀雨師出雲氣於山川彌綸瓊巖濯天章於河漢飛洒  
玉都今則肇起玄壇導迎法駕伏願六龍調馭順和協於陰陽萬物  
潤滋肅澄清於天地

長春宮祈福保安齋意

上天眷佑長貽宗社之隆至道冲盈式衍邦家之福屬偶嬰於疾疢  
爰謹事於禱祈伏願聖鑒昭回祥光旁燭身逢康泰暨中壺以平安  
運協壽昌與多方而寧謐

青詞

治平之運仰荷洪庥疾疢之生敢忘忱禱爰命羽衣之士敬敷寶笈  
之科伏願五帝儲華三光協德身康疆而逢吉有永壽祺國清淨以  
無爲均蒙福惠

崇真宮祈福保安齋意

不承付託仰資天地之和祗有起居偶感陰陽之沴喜遘臻於康復  
爰謹致於禱祈伏願輯福上躬錫禧中壺前星炳煥協家國之奠安  
景貺熙明及臣民而定壹神明垂祐不顯隆平福履愆和偶嬰疾疢  
敬祠琳宇備葳瓊科伏願景貺來臻壽祺永錫康強逢吉 承宗社  
之安化育成功長乾坤之造



祭海神文

潮失故道犯我鹽官有司捍防民力既殫閱歷歲時靡濟茲害浙郡  
多下恐就淪敗民實何辜不德在予相臣來言交修用孚乃勅中外  
悉智展力相爾有臣亦克受職我土既固民生底安六府治修報祀  
萬年

祭伍子胥文

爾以忠隕主潮于吳潮今爲災吳其沼乎爾其揚靈具訓海若俾安  
其常毋作民虐既止既安民遂有生爾作明神永有令名

大龍翔集慶寺正殿小上梁文

伏以龍光有赫象教方興式嚴前殿之崇祇奉祇園之勝上棟下宇  
方締構於良工細榘大衆並具材於貞榦成規斯在願力維弘伏願  
天相聖心佛加神運百重闌楯移來天際之慈雲萬歲山河永鎮人  
間之福地

吾殿上梁文

兜率化宮移來地上梵天新刹示現人閒坐延衆佛之臨殿有四阿  
之制鉤心鬪角先崇締構之宜審面飭材已具經營之素式觀地架  
儼若天成伏願龍象却扶鳳皇翔繞丹青金碧赫然佛日之輝黼黻

文章永著 皇風之盛

大龍翔集慶寺正殿上梁文

伏以虎踞龍蟠卽淵潛之佳地雲興霧滄建梵釋之新宮巍巍中正之居赫赫大雄之座欽惟 欽天統聖至德誠功大文孝皇帝惟天爲大如日之升經綸既正於洪規崇信不忘於願力美矣善矣大成舜帝之節韶經之營之匪爲文王之臺沼我佛有護國救民之助吾皇示報功崇德之心黃金滿布於祗園華構上移於兜率式崇大殿爰舉脩梁相我工人陳茲善頌

拋梁東

日上扶桑散曙紅鹿苑珠璣涵曉露鐘山草木動

春風

拋梁西

石城突兀護江堤舊遊曾見羣龍舞望幸猶聞六

馬嘶

拋梁南

蒼龍曾此臥江潭風雲會合千峯一山谷傳呼萬

歲三

拋梁北

瞻望帝星臨萬國山川誰爲地東南形勢只知天

咫尺

拋梁上

白玉毫光千萬丈 吾皇還似覺皇尊龍象人天

皆拱向

拋梁下

亦有幘幪千萬厦彌天法雨本無私滿月明珠寧

有價

伏願上梁之後

皇基鞏固紺宇尊高紀億萬年共祝

聖神之壽遍大千界同沾殊妙之恩萬歲萬歲萬萬歲

吾殿上梁文

伏以浴日九淵現禎符於鐘阜承天八柱建名剎於冶城爰開方廣之筵用祝周阿之殿欽惟

欽天統聖至德誠功大文孝皇帝清明有鑠故舊不遺鷺起星河萬斛綵舟之容與鳳歸天闕七重寶樹之檀欒凡輟跡之所臨宜珠光之共護脩梁肇舉善頌斯陳

拋梁東

萬丈紅光接寶宮古佛昔來龍繞座高僧時謁錫

飛空

拋梁西

長安日近碧雲齊但依丹闕瞻龍象卽是鸞輿慰

耄倪

拋梁南

千年王氣現優曇浴龍池水皆功德擁日山峯盡

翠嵐

拋梁北

上意每憐江樹碧紺宮留鎮國南門華蓋瞻依天

北極

拋梁上

紫蓋紅雲春蕩漾舉頭見日庶民心思佛思君同

一想

拋梁下

慈雲恩雨均沾灑二年以至萬斯年長樂昇平承

福嘏

伏願上梁之後

皇風遠播佛日同輝四字八荒總被覺慈之化億

靈萬載永歌帝力之加萬歲萬歲萬萬歲

道園學古錄卷之二十六

道園學古錄卷之二十七

歸田藁一

雍 虞 集 伯 生

賦

東皋賦 爲趙德莊作

出東郭以騁望得逶迤之方皋窈窕修筠之舍盤桓嘉樹之高秀野  
綠縵長渠翠濤界畦曠以分畫列藩籬乎周遭汎崇蘭於舊畹薦幽  
澗之新毛鳶魚樂兮天光雲影之動蕩虎豹蔚兮山輝川媚之薰陶  
結幽居以靜好不窺園以爲傲或視明星而弋鴈或饜朋酒而魚羔  
其有棄敝履於軒冕託遺響於歌騷者乎吁嗟惟麟黍稷在畿眇故  
封兮江海悵王孫兮不歸載耘載耔載裳載衣忽十世其將遠挺三  
君而奮飛奉賢書以造廷並策名於常旂鸞翔鳳翽赫其有輝值炎  
精之旣淪遽斂翮於熹微於穆趙侯知德者稀中田有廬兮種瓜北  
山無蹊兮采薇悄悄隱憂兮願懷懇懇畚畚兮疇依慨膚士之不億  
懼俯仰之多違侃侃廣文特起無儔內有明賢之助外嬰憂患之酬  
二親高年一身百謀煦煦陽春英英涼秋屢專席於各郡常曳裾於  
諸侯觴詠不間於絲竹旨甘煩及於交游積累之勤百福是道婉婉  
子孫食德不渝嗟予少時迎于名門揮絃飛鴻垂綸游鯤老至不知



珍傲宋版印  
車懸身存夕草載露黯然銷魂訊故老於岑隅索履跡於崖根秀娟  
娟兮既長鬱蒼蒼兮彌尊孰辟世於醉鄉樂舒嘯於丘園晨光粲其  
盈庭鶴鳴聞于九天黍稌既豐華實載繁俎豆衣冠古而又文東臯  
之人其昔之桃源也邪

芝亭永言

古詩四言

環洲詩爲蔡天璧作

溪有清流環我中洲雜華鮮明芳草和柔詠有文君鳴有睢鳩采采  
遊女侃侃良疇載泳載游在我中沚遡遡無端沿沿無止既采蘋藻  
亦有蘭芷觀彼嘉魚一日千里彼畎彼畝皆爲方田分合雍丘交流  
璧旋星迴于天雲媚于川君子樂豈眉壽永年言命輕舟言載百壺  
駕我乘黃履我雙鳧汎汎彭蠡至于匡廬詠歌以歸清風載途

冰雪相看亭

原序

趙君有道之先故宋南渡時自東都徙分宜二百年于茲矣其  
大父登進士第仕至文林郎湖北憲司幹辦公事其父兩舉江  
西轉運司進士覃恩受官宋亡不復仕城東故地美竹萬个作  
亭其間而隱焉名之曰冰雪相看信國公之子平遠宣慰之所

題也有道信厚敦愿衣冠容氣翩翩然有王孫公子之遺風敏稼穡以服徵賦謹詩禮以保族姓無外驚無妄求弗變其父之志以老其身以長其子孫是以士君子稱焉夫元亨利貞之爲德猶春夏秋冬以爲時也君子觀乎運序以自處則合於時措之宜而不過焉方其以振振麟趾之賢處富貴之極則元亨春夏之時也自其來南族蕃以久非秋之利乎其在有道爲冬之貞無疑矣冰至堅而不折雪至潔而不汙凜然相看不接於他物誠得處貞之道也予聞而善之故爲之賦詩焉

挺挺直筠琴罔之陰豈無春陽匪今斯今高宜於天下蟠地深不易其節侃侃素心豈無膚敏白駒駸駸我獨考槃樂乎幽林堅冰在淵積雪在岑獨往不迴悠然行吟采采紫芝園綺是尋還求陶生撫我素琴邈乎古人副我夙欽

竹林七賢圖

瞻彼脩竹下臨清流文石偃隄華松蔭丘植表界壤翦茅宅幽梁度高巘臺隱中洲方床讀書異宮同休詠歌相聞觴豆相求或時名藥或釣游儵課藝嘉植坐思遠游濯纓微波看雲良疇逸而不放儼而自脩泰哉沮溺邈乎巢由按圖以觀永宜春秋孰若七君遺其故儔

糟粕塵世高蹤莊周我懷古人遯而違憂安得揮絃以招湛浮

竹溪六逸圖

悠悠逝川矯矯逸民攜書相從敷席水濱支頤負暄揮羽却塵躡屐  
遠道隱几重茵幽響中發虛觴載陳投我嘉實含和茹醇優哉悠哉  
及茲良辰山有鳴鳥郊有游麟濟濟以寧我懷古人

古詩五言

題汪華玉所藏蘭亭圖

衡茅負晴旭有客至我門共披會稽圖山木盛繽紛衆賢坐水次飛  
觴汎汎云夷曠各有趣高閒知右軍幽情付後覽陳迹感前欣悠悠  
千載來不異更日昏探穴問神禹望海悲秦君逝者皆如斯死生固  
奚云所以鼓瑟人思從童冠羣春服沂新浴歸歟聊永言撫卷不知  
老遐思在茲文東南極積水日暮多浮雲

寄題曹元賓尚書臨流圖王繼學參政畫

昔聞適炎服中道臨清漪瀟瀟蕩荒日悠悠動寒颼來者何滔滔逝  
者不可追聖有川上歎晝夜固如斯解纓手自濯浩蕩忘險夷高人  
今摩詰萬里同襟期抽毫寫幽思帶雨更題詩三年反田里春河釋  
冰澌舟楫繫野樹灌沐晞晨曦上堂喜懼集艱辛謝親慈入室換野

服登山采靈芝庶以永年壽豈惟療朝飢開囊見舊物感慨深係之  
歲晚金石友看雲立多時憐我不共看寄言令我知來鴻春苦早去  
燕秋易衰道遠不相覲加餐慰遐思

玉隆留題

仙真治茲山重阜隱延廣冲奧元氣會運至法靈響與世作司命神  
宇廓弘敞及門春雨來玄感副夙仰摩挲晉時樹託身何蕭爽千載  
抱微息日月共來往欲爲黃髮期日待紫芝長上天垂光彩月出江  
海上故人不可待惆悵理歸鞅

黃堂留題

雲館息塵鞅夜聞春雨聲溪水傍階長仙茅新綠生曉氣動原野曠  
分見夷平神真昔參合觀泉宅幽貞儼然師弟子歲來會秋清遺民  
千載後高宴從簫笙因嗟蚤好道晚歸濯冠纓矯首望遠海駕言羽  
翰成神仙在平地崎嶇愧凡情太乙有移召中洲良可營

記夢

夢行衡廬間千仞過蒼壁崇高仰神明深廣下不測雲雨蓄旁礴時  
至如欲出網緼尙回旋揮霍忽奔逸物怪匿岩穴變若俟霹靂黑波  
汎高樹木葉走崩石升身登玄間縱觀龍變跡俯視九州野草木有

輝澤乃在風雨外手畫素三尺揮毫極動盪落墨更沉鬱圖成示坐人共笑不可得顧瞻以踟躕恍惚增歎息因之命肩輿出門聊有適大術何舒舒白鶴從數客略經幽澗濱便上青松側憑高望遠水雙景蕩虛碧拂石共客坐芳草藉尻膝忽然聞鐘聲睡覺北窗席

次韻陳溪山樓履

頗憶蜀井西樓欄每易討披心割魚子束皮充彗掃制工巧紉履文織象花草輕鬆隔沮洳緩步得堅好長跪獻圯下會期後三早知君貴賤履陟降恆有道憐我涉世深垂誠不待造兢兢歷淵冰縮縮奉師保時行不違矩庶慊歲年老

其二

解鳥還上方歸山據枯槁禁足結僧夏陳編謝探討隱几或過晝凝塵遂忘掃行庭不見人誰或踐生草實由筋力衰無復馳走好前年當此時嚴召出城早追度龍門水賜見沙領道鼎湖忽踰年始克罷趨造感君素履詠幽貞可長保番番茹芝人長歌豈知老

其三

六月乃屢雨良田不憂槁獨念桂林戍觸熱赴南討道路備攘掠所過淨於掃縛人夜送軍吏卒何草草蠻獠亦人類義利啓戎好尋原



可制亂機要貴及早夜來送者還頗言喝橫道諸軍四面集同月約  
皆造誰爲飢渴謀性命安可保藜藿雖滿盤對之令人老

浮丘公吟寄赤城陳道士入山有遇爲溪山壽

浮丘生上古形神蓋不泯說詩秦漢間安知非斯人世俗苦淺迫無  
能信真淳雨雲不待攷飛光越窗塵豈知有道者千歲一息勻金精  
歷可鍊色重無磨磷蒼蒼紫玄峯咫尺天北辰神明寂已定尊高此  
依因握機稟元化同流溥無垠所以赤城子從師踐荆榛三周日月  
中志確神乃親廬間玉雪相旭陽射光新稽首受餘啜骨換非昔民  
不遠恆在茲睠然願知津先生早有聞爲恭若逡巡賤子請執御端  
輓駕飛麟

爲變理普化題陳立所作龍眠山圖

變侯起高科得邑舒水上民淳事稀簡田野甚夷曠戰爭遺跡泯山  
水良足賞幽棲南昌尉英爽赤壁將古仙家白雲美人化黃壤岩岩  
龍眠山一士獨可尙高懷托千載妙畫極羣象向來讀書處春雨草  
木長夷猶昔賢遠瑤席共來享彈琴坐終日微泉散清響來者安可  
期徘徊以惆悵畫圖記彷彿聊以慰遐想

和陳溪山韻

幽人慎素履古道思獨往  
瞋目登高臺浮雲不足上  
丹砂煉仙骨沆瀣濯神爽  
遠懷澄江靜耿若孤月  
朗河漢自傾注山川邈游  
想斂跡倦飛翼歸耕故時  
壤好風從東來空谷感遺  
響詔書薦遺逸郡府屬高  
仰聊持東湖水往助敬亭  
賞

和陳溪山送蘭花韻

幽林有藜蘭菁菁秋不衰  
憐彼采藥人不識敷榮時  
涼風動綠葉清露生華滋  
世傳神農經圖書竟空披  
深根寄連茹藉以瓊瑰詞  
同心永爲好豈但服食宜  
先民昔有言所貴希見知  
舊聞絕行仙晚有童孺姿  
南陽有黃華西山多紫芝  
度世未聞道咀嚼空莖枝  
湛一保冲炁執御正不奇  
靈苗無助長無爲以熙怡  
始信斷金利終古真不移  
千載同一息敢忘君子期

送空岩印公還徑山

東出楞伽室西望香爐峯  
曲折披翳藿蕭條倚枯筇  
然燈共過夜曝日忽經冬  
天山斷緣想海國識行蹤  
忘言及生滅抽簡托疏慵  
追憶塔中相表茲雲際封  
嶠父謝五鳳永護煩雙龍

題張觀海所攜虛舟竹所二毛圖

虛舟倚亭皋脩竹相因依  
水木有清華魚鳥淡忘歸  
鵝羣晚色靜鶴

羽傍林暉相是鑑湖曲幽栖掛朝衣古道日已遠昔人相見稀蒼茫  
寫雲霧蓬壺是耶非

送龍翔高獨峯上人還金陵

承詔寫宮榜馳使出丹闕黃金射江海光景依日月邇來垂十載感  
遇嗟白髮神靈在雲漢畎畝慨明發祇園何潭潭夙志返超忽幽士  
住精舍諸妄久息歇浩劫鑑止水高峯獨嶒嶒觀察勝願力知我心  
兀兀清風不可執振錫出林樾

送海東鈿上人十首用雲霞出海曙梅柳度江春爲韻

積水衆鷗滅春空藹餘雲掩室坐脩竹天花散繽紛上人東海客來  
去何見聞飛錫還日下珠宮浪沅沅

日色出海水千波散明霞一杯承足來九載不爲賒要觀香爐峯折  
蘆長風沙微吟動林響蒼龍送浮槎

我昔參泰霞東望候日出子從日下來海水中蕩潏坐受龍女珠簾  
垂夜光室持還定何有長空斷鴈一

爲法不辭遠遨遊歷年載衣中得故珠終夜動光彩還持一支葦歸  
泛萬里海駕言乘桴行沙際如可待

旨蓄崇虛豆生芻長冰暑無堪餉遠客乘下若爲住行囊掛屋壁破

榻夜風雨神光發慧劍耿射東海曙

燕坐共禪月行吟向孤梅有懷匡廬山老人岌崔嵬洗鉢三峽水振  
木東林臺乘槎動歸思欲去更徘徊

山居如老禪坐致不請友何方簷下雲識我門前柳翠竹不礙山黃  
花紛在手未覺酬對難離妄亦無取

老胡昔東游勝士乃西度到岸無彼此不憚勞笈屨要之心本空一  
了不移步龍宮解相迎黃金已先布

百鍊成利器千金來海邦清霜凝秋水國士歎無雙持正行正法魔  
邪孰不降觀子製名字高風凜寒江

止觀覓心要律儀檢凡身密言轉相付海刹幾秋春奇哉善根熟一  
徹無逡巡子來得何法歸報日邊人

楚石琛藏主自蔣山歸却欲就叢林閱藏同舟清江之上  
賦此贈之

手攜北山雲却上西江水月明洲渚生葉落風不起虛舟不移棹寒  
波釣金鯉銀河轉碧落北斗去天咫龍吟匣中劍虎躍弦上矢殺機  
誰敢當吹毛豈輕試貝葉啓千函木榻脫雙履惟應勝壁觀悠悠度  
年歲

題東郊山房

秀挺東郊山雲氣常覆之林丘翳幽潛流泉發芳滋盤桓在中谷良  
疇漾清陂開堂直罔景長年誦書詩孝友夙所敦求道遠有師雅志  
尙端潔凡近諒難知康樂昔賜履詠歌足遐思啓書訪前聞往跡無  
所遺瞻彼南澗松深根連喬枝亭亭植高節鬱鬱含令姿衆木不同  
泯悠哉副深期

題蒙庵爲黃石谷賦

東南有高丘下臨萬家邑汪洋春潤沃衍盛秋入羣山若浪波起  
伏翠重襲靈運好奇險高平罕相及幽人園綺間周覽度原隰隨山  
導清泉積石拾層級結庵以蒙名果行信所執良時一來游朔月九  
交十門當星斗高隴臥風雨濕一川燈火歸賓從雜車笠登高愧能  
賦騰身竦山立

爲黃氏賦大雅詩

岐山鬱嵯峨鳴鳥昔有聞周公盛制作經綸以彌文朝事接燕饗勸  
勞兼賓軍肅雝述盛德工歌贊前勳流蕩桑濮靡何由返咸雲陳肆  
輒有見吳季真不羣公子有古絃歷然宮徵分大雅忽有作青春日  
方殷高堂以居之樂康永欣欣



己卯十月廿二日從宜春郡幙嚴伯威觀南軒新閣登舟  
有賦却寄同游者劉粹中賢良

茲郡多美泉小大各有神深潤浹温厚草木何光新披圖閱名世顧  
皆仙佛人退讓寡外驚懷哉此良民退之文既遠泰伯學未醇昔我  
朱與張遺言存縉紳東湖有新閣下臨南澗濱周眺忽已晚皎然仰  
空旻虹梁亘溪流落日車馬塵曾丘間叢祠鍾鼓嚴昏晨江潭嘆搖  
落各邦感宜春為治古有道川原隨所因華構相為雄大雅竟誰陳  
移舟古峽口西望蒼嶙峋浩蕩無與語逝波絕垂綸

秋堂原序

秋堂者臨川吳生文明之親舍也生才甚清美賦詩婉麗無塵  
滓之汨觀其同門未之及也昔胡邦衡以詩人薦朱文公大儒  
豈以玩物以成名哉性情之正冲和之至發諸詠歌自非衆人  
之所能而士大夫各以其見見之耳生未可自喜自畫也是以  
為賦秋堂詩云

閨巷多囂塵秋堂獨高深有子能讀書幽懷發微吟天高風露下澗  
泉落危岑神仙絕飲食穢濁無留沉所以聽夜誦共愛風滿林神清  
易以哀情長恐成淫大冶昔有作九牧歸吉金熬樞下五石功成振

鴻音宣風萬物暢神祇肅有臨鳳鳥鳴岐山人文示來今候蟲入床  
下嗟哉苦勞心

清風拂高堂舊席忽已除下堂具甘旨上堂列琴書垂紳夙夜至再  
拜問起居誦詩已三百習禮少壯餘納交君子室執御長者車爲樂  
古之道誰能笑其迂

題雪泉齋

長河沍凝合微泉自温活蛟龍依以生抱困待春發南雪不到地流  
泉常在山飛英散絕澗流澌響潺湲融結各有方不息在無二觀茲  
保深長乃得養生理濯尊薦寒冽春陽向熙怡君子遠莫致永言以  
相貽

平江開元雪牕光禪師訪予臨川山中其歸也予與賓客  
用一兩六月涼中宵大江滿分韻送之不足予爲繼之而  
予分得一字

積雪何處高蜀山最嶮崿海東極孤絕目送斷鴻一徘徊杪櫛樹宴  
坐但空室園果墮宿雨當晝從定出八月露水繁石鉢滿華蜜相會  
豈無因分床便深密

賦彭氏靜深堂

君子澹無欲淵然事幽潛貞居觀物初天機引休恬寂寂象愚朴容  
容無斃獸羣動不知止謀思墮鈎籍反息不及踵乘舟膠漸漸豈知  
本湛一不與利欲兼圖書發聖縕受命孚不占戒慎保靈秀先幾發  
微纖進善取損益閑存日惟嚴浩浩厚有積悠悠浸何淹盈科以時  
行小人慚屬饜虛堂積雨霽光風草侵簾空洞溥龍澤止水澄秋蟾  
善學在年富勇哉副遐瞻

秋山行旅圖

春夏農務急新涼事征游飯糗旣盈囊治絲亦催裘升高踐白石降  
觀索輕舟試問將何之結客趨神州珠光照連乘寶劍珊瑚鈎乘馬  
垂首循縱目上高丘策名羽林郎談笑覓封侯大行何崔嵬日暮摧  
回轉古木多悲風長途使人愁羸驂見木末足倦霜雪稠谷口何人  
耕禾黍正盈疇出門不及里酒饌相綢繆壯者酣以歌期頤醉而休  
安知萬里事有此千歲憂

爲題馬竹所九歌圖

屈子久去國行吟山澤秋思君不復見婆婆感巫謳仰瞻貴神遠俯  
慨深篁幽衝波起浩蕩玄雲黯綢繆初陽翳扶桑蒼蕩海漚渺渺  
君夫人遺玦在中洲壽夭乘陰陽孰知制命由慨然長太息悲歌寫

離憂想象以愴悅開卷令人愁

清明山房詩爲危太樸作

矯首望太清正色蒼以玄  
皦皦何歷歷日星高轉旋  
游塵雜氛氣起滅尋丈間  
容光見擾擾孰與爲控搏  
所以學仙者凌空怡妙顏  
質化入常寂凝暉托空山  
據會觀往來生死何足患  
妙哉太樸子難爲世上言

次韻太樸良友伴何仙舟讀書山中見懷之作

得謝荷休澤逍遙在巖阿  
結廬庇風雨樊圃搯藤蘿  
塞坐古人書日夕猶詠歌  
追念少壯日玩愒亦已多  
兢兢事補塞奈此遲暮何  
美人百里內邈若隔山河  
興懷貽好音溫藉三春花  
報言慎芳歲卷石崇巍峨

道園學古錄卷之二十七

卷之五

五

五

五

五

五

五

五

五

五

五

五

五

五

五



道園學古錄卷之二十八

歸田藁二

雍 虞 集 伯 生

芝亭永言

古詩七言

江樓看劍歌書趙子昂劍銘後

豫章高秋宴高閣乃出此劍相娛樂當時冶鑄絕精英土蝕沙沉更  
銷鑠遺質所存如冷電江光不與晝光却神光內閱氣逾深識察誰  
能動冥漠等閒千年不一試壯士酣歌謾揮霍嗟予衰朽雪滿顛空  
對涼風起天末或言江中有蛟螭當煩仙人下寥廓吾故臨風拂其  
鏑俾伏崖陰無敢作

劉忠肅公之四世孫中書舍人諱震孫之曾孫益之題其  
居曰雲松巢子家與劉氏累世之契故爲書忠肅公文集  
之首詩三篇并賦此詩與之

丞相昔遊泰山頂天風浩浩春晝永玉檢微茫不可求但覺靈霞熟  
丹鼎白日人間如水流前代衣冠成古丘悠悠憂患何足計直道千  
年橫素秋徂徠之松數千尺東連海上莫烟碧中書偉人如玉立每  
向南風望東北濁世公子何翩翩却憶匡廬還謫仙夫容出水耀初

日五色光新天爲妍我今僑居廬阜側西視峨眉歸未得豈無雲錦  
晚相娛月落終懷雪山白森森喬木魯東家河間禮樂更光華勿忘  
先世舊遊處吾秣爾馬膏其車

吳興趙子昂十馬圖

昔在祕閣見十馬云是韋偃之所畫此圖位置略相似心神偶同豈  
臨寫馬種本自渥洼來灌濯清泉更瀟洒常恐一旦風雨至蹙踏波  
濤逐神化英雄意氣今豈無未見深沉如此者君看最後臨岸驄自  
是真龍世無價

畫馬

百年升平却走馬立仗天閑常見畫蕭灘灘頭八十翁却寫西來大  
宛者高蹄如鐵項如鈎風鬣蕭蕭首偕秋常見貢來騎不得長嘶要  
蹴崐崙丘

題畫

連昌宮裏古牆陰積雨過春黃竹深老樹無枝交屈鐵立石有書名  
錯金吮毫池上寫幽鳥承恩春日風光好當時執戟今白頭却對蕭  
森倚秋昊

空山歌

高空之山聶公宅稚川作圖纔數尺秋天薄雲千仞表春雨喬林百年物憶昔侍郎鎮成都將佐盈庭賓客趨錦官城外笳鼓發駟馬橋邊高蓋車先廬舊在小東郭丞相祠堂同寂寞嚴公同訪杜陵家退之亦到淮西幙峨眉嵯峨久不歸江水娛人秋日暉坐看蓬萊變桑海自古南城天下稀公子親迎陳氏館我初至撫猶弱冠看君揮翰甚風流豈想重逢鬢毛換君言中間一再來數見先公胸次開鶯花風雨必求友水竹園林持酒盃嗟予晚歲始能退寧有文章驚海內平生不受簡書畏故家高致君應最圖中山色積翠濃雖欲舍子將焉從蜀人相如最能賦行倚山木歌高空

爲燮玄圃題鼈溪春曉圖

夫容山陽萬家邑石嶺戴轍縈紆入溪水西行夜雨深連村桑柘春雲濕昔因荒迥少官府日莫狐兔作人立自從置縣二百年稍有衣冠更俗習讀書進士比舍聞潤屋黃金亦家給山中白日浮雲多負乘因仍足車笠燮侯世胄國勳舊射策君門恥沿襲朱衣作監列星宿遠人豈意高軒及援琴不鼓書牒稀彈鋏無魚賓客集繡衣使者停車見黃堂大夫下床揖登高望遠送飛鴻攬轡駸駸度原隰人言桐鄉人愛我我愛桐鄉重於悒畫圖千疊山木稠茂舍蕭條莫忘葺

題馬竹所畫

霜清木落江海空一棹歸來何處翁雙松千歲如鐵石爲爾回薄旋  
天風憶昔神龍劍所化夕臥滄波弄明月望中冉冉雲氣生直接銀  
河上瓊巖

霍元鎮規模董北苑米南宮父子寫山水人物殊有標致  
見示春江捕魚圖遂賦此

春江聚網萬魚急漁人相謹魚相泣負薪深山何處樵利害相乘不  
相及海鷗冥冥秋影微黃葉江南一棹歸人間得失兩無迹不廢山  
水含清暉

南岡

華蓋三峯立天表山北山南青未了曾看雨雲出太虛幾送餘霞落  
飛鳥岡頭春歸露未晞梧桐鳳皇相因依臥龍之孫思外氏悵望輝  
光生翠微

題何大夫畫馬

國朝畫手何大夫親臨伯時閱馬圖伯時絕憶鐵面語放筆驂騮懷  
此都此都大夫八九十千馬萬馬在胸臆偶然數鬣落江南捲束上  
箱謝槽櫪

同開先南楚悅禪師觀息齋畫竹卷於崇仁普安寺煜公  
之禪室蓋煜之師一初本公所藏也因記延祐甲寅息齋  
奉

詔寫嘉熙殿壁南楚與之同寓慶壽寺中予時爲太常博  
士俯仰之間已爲陳迹乃題其後云

嘉熙殿裏春日長集賢奉詔寫蒼筤邇來二十有五載飄零殘墨到  
江鄉匡廬高人昔同住身見揮毫鳳鸞翥木枯石爛是何年脩竹森  
森長春雨

題村田樂圖

尺素自是高唐物瑩如秋水宜設色何人畫此畎畝間二三老人若  
相識茅屋蕭條古樹下農務未殷牛在野或憐鸚鵡脫籠繫或弄獼  
猴笑真假老翁政自如兒嬉高髻襁負相扶持古時粉社祀田祖移  
饌高亭隨所宜抱甕初來未貯酒亦有生鵝宛延首村優競攜樂具  
至犬怪雞驚兒拍手拄杖出門欣見賓雜華滿庭生好春歲時無事  
得如此擊壤何必非堯民騎驢過橋殊豐饌攜具荒陂來赴約定知  
張果千歲人游戲人間共盃酌

柳塘野鴨



江南水退秋光淺風柳參差萬絲捲鴛鴦在梁鳧在渚蕩蕩扁舟去  
家遠千艘轉海占長策白粲連江動秋色斷蒲折葦野水闊爛爛明  
星日將弋翠盤擎露夜深寒玉色亭亭落月殘太液池頭黃鵠下夢  
中曾見畫中看

丙吉問牛喘圖

少陽用事春猶淺丞相公行問牛喘三公職事知者稀嗟彼德微蒙  
策免天子有道守四夷中心無爲日萬幾遠有甸服近有畿夙夜明  
哲發裳衣

江貫道江山平遠圖

江參去世二百年翰墨零落多無傳人間幾人寫山水誰能意在揮  
毫前昨見石林舊家物春雷疊嶂初破墨我和葉詩頗豪放二者相  
望都突兀險危易好平遠難如此千里數尺間高雲舒卷非散地麗  
日照耀皆各山我持美脯酒一斗墨汁盈盈可濡首江生精神作此  
山向山呼生當至否高秋銀漢天無雲帷中泠然來夜分黃茅嶺頭  
華蓋頂畫我獨訪浮丘君

爲汪華玉題所藏長江萬鴉圖

雲巢幽人愛江渚抽思揮毫寫橫素波瀾不驚潦水盡秋氣晶明絕

烟霧征帆去棹不相襲岸曲洲旋總堪賦孤村城市僅如蟻百丈長  
江直如縷蕭蕭木葉洞庭波歷歷晴川漢陽樹蒹葭宿鴈天欲霜叢  
葦寒鴉日將暮就中樓觀何王宮想見華年貯歌舞丹青倒景駭靈  
怪粉黛含情怨幽阻青春遊子澹忘歸白日冷風帳中語人間遺迹  
何足留最惜精思墮塵土郭熙平遠無散地小米蒼茫托天趣銛鋒  
銳戟不破墨刻畫晶熒昔誰苦渤海細書藝文草精絕戈波絕回互  
南唐後主萬鴉圖點點晨光動毛羽昔年曾見今日昏雖復逢之亦  
難睹汪侯此卷出故家相示摩挲極愁予香奩犀軸見者稀謾錄餘  
情示來者

盤車圖

大車麟麟牛駕軛西望大行雪千尺往時飛挽實長安百兩仰關過  
阡陌亂流十里九屈曲水濺車箱沙沒轂前和後應日云暮王事有  
程車下宿旂旐央央昔臨洛東南會期出方嶽侯伯有位賦有差載  
幣瞻迎來若若君不見海艘百萬乘天風京坻連雲多腐紅天子視  
朝大明宮千乘萬騎來何雄

贈羽士費無隱

東望雲林三十六聞有仙人結茅屋清露零零采紫芝白雪深深屬

黃獨國初山下苦流離義士傾家救世危百年孫子俱華髮誰解燈  
前說舊時聖恩深重絕征戰猶慮寒溫資瞑眩身着黃冠寫古方薄  
素細書三十卷相從寂寞久者誰禹穴山頭一布衣鬢如鴉羽顏如  
雪跳入壺中夜不歸市人扣門呼不應光影俱消聲色泯但言解隱  
不言無不道本無何所隱我欲作丹須汞金人間無藥不堪尋青霞  
如練還相覓華蓋衝天丈室深

題漁村圖

黃葉江南何處村漁翁三兩坐槐根隔溪相就一烟棹老嫗具炊雙  
瓦盆霜前漁官未竭澤蟹中抱黃鯉肪白已烹甘瓠當晨粲更擷寒  
蔬共萑席垂竿何人無意來晚風落葉何籜穗了無得失動微念况  
有興亡生遠哀憶昔采芝有園綺猶被留侯迫之起莫將名姓落人  
間隨此橫圖卷秋水

題韓幹畫馬

韓生觀馬十二閑時寫一二傳人間坡翁嘗來伯時宅見此遺迹開  
衰顏前行如雲塵不動後者追風絕飛鞚昔人能事己可能始覺賞  
識非虛諷昔觀祕府韓絕少得見龍眠已驚倒使人讀詩如見畫人  
中豈復生坡老五雲之中天上奇代產名駒天子騎神明尙令後古

見莫歎韓生非畫師

題黃都事仲綱山居溪閣圖二首

出山作官十載餘聊托筆墨懷幽居連雲一一列眉黛細雨往往逢  
樵漁隣家父老每載酒隔屋弟兄皆讀書我久居山不待畫獨念稚  
子扶犁鉏

閣前流水秋愈深故人東來還見尋方舟直過彭蠡澤把釣坐對香  
爐岑雲中烟樹差可辨江上鄉關誰與吟我欲芳蘭寄遠者日暮天  
際多輕陰

題秦號二夫人承召遊華清宮圖

貴人並輓如輕鴻承恩馳入華清宮道途先不止行客策蹇奔趨烏  
帽風奚囊墮地何足拾豈有篇章浪相及畫史當時妙墨傳光彩流  
動狂情急君不見白頭拾遺徒步歸明眸皓齒事皆非朝天泥滑袖  
封事高閣雨餘宮漏稀

方壺畫山水歌

方壺之山在海中世人欲見知無從壺中仙人閔昏濁綵筆手開三  
五峯亭亭兩箇老松樹萬壑千崖閱今古憶昔長從王子喬坐聽秋  
風最高處世人畫山非不多不識真山奈若何君看昆侖上丹穴芝

泉玉樹森婆娑東望方壺應不遠飛度九州如過電便從海上問金  
公莫待浮杯水清淺

示罔

憶我蚤歲離親側足自跋踈心惻惻中年祿廩不及養人羨清華已  
驚惕歸來老病五年餘閔子謀食躬犁鋤蓬蒿羅生果窳異蛛網微  
細仍縈紆星河江上喜非遠况與良朋適我願故人念我一相見暑  
中尙慎柅樓轉

律詩五言

玉隆宮所藏宋乾道宸翰雲壑二字

昔者雲歸壑天章自九重日華常暎鳳山氣盡成龍俯仰遺陳迹高  
深儼德容飄然化春雨結想在高松

寄忽承旨

投老清江外依山結數椽扶藜循水竹把筆賦雲烟歲熟無憂食秋  
清不礙眠故人相望遠北極在天邊

寄三衢守馬九皋

聞道三衢守年豐郡事稀詩成花覆帽酒列錦成圍鶴髮明春雪貂  
裘對夕暉扁舟應載客閒聽洞簫歸



題朱澤民山水

積雪山陰道嵯峨筆底生雲門見童子禹穴閱蛟精高臥人何在幽情幾詠成杜陵空想象晚飯施樓晴

寄題汪道士草亭

飛白妙娉婷新題照草亭仙遺相鶴法客借換鵝經霧雨歸懸黍風雲護伏苓遙知春晝永深坐養黃庭

黃敬延送竹本

分得瀟湘玉森森忽滿林香爐來曉色石檻借清陰好共芝蘭長毋令草蔓侵清風月如晝老朽要長吟

聞鴈

樓近煖雲濕夜深歸鴈低聲音燈外盡羽翮月邊迷冉冉白榆上悠悠黃竹西應逢穆王駿春草一長嘶

錢舜舉畫

一樹花如雪清明客未歸坐看黃鳥並夢作綵雲飛翠袖寒猶薄羊車過絕稀相如能作賦月下卷春衣

山水圖

泛舟桑落浦望見香爐峯野水常欹樹山雲不礙鍾桃源攜客覓松

徑與僧逢爲託荆關輩添予九節筇

丹霞觀黃知微留別

寓館隔溪津過從厭市塵振衣清露曉拄笏野亭春歸作芝田主思  
存黍谷神松華頻寄取老去欲輕身

題馬竹所畫

老樹依江岸歸舟傍釣竿水花看晚淨風葉識天寒鴈字來千里魚  
羹付一餐遠山青可隱日下是長安

題曹霸馬

將軍今爲庶畫馬寄高情聚立天風起長嘶沙草生飛揚萬里意凌  
亂五星精日暮太行道悲哉長短行

答陳溪山元日卽事

積雪埃塵淨光風宇宙新間來知惜日老去善酬春退密觀羣動憑  
虛集百神真人起居法無一是違仁

送客北門晨登山木閣

晨登山木閣零雨煖於春溪水解留客梅花偏照人林香知酒熟市  
遠覺民淳此地堪娛老惟愁度水頻

次韻陳溪山

移棹避殘暑開樽就夕陰冥鴻聊自遠幽草若爲吟離索連二月棲  
遲共寸心遙憐溪上晚扶策獨臨深

又

乘興忽忘遠相思知幾何未便塵事少謾悔世緣多朝食烹芝菌秋  
衣製芰荷平生但隨運何地不蹉跎

杏園詩爲黃思順賦

善藥多陰德名花種滿園暄風吹雪盡暑雨綴金繁臥護煩仙虎分  
嘗任野猿佳兒足文學食實似桃源

...

...

...

...

...

...

...

寄題樓撫山普潤禪寺

寺在撫州城南八十里唐普潤禪師道場師姓翁氏元和元年二月八日坐化於潭州有靈異州人就肉身裝塑後現夢撫州太守迎歸建寺至今遺體堅固如初靈應尤著

高人出世間未忘鄉里思靈骨萬里還深恩千載遺嘉穀歲恆登羣

生無癘疵古刹抱禪悅高丘依母慈寺右有師母墳名翁家林即師

故俗家崇構起積廢新堂納華滋今長老秋雲富公所建東隣有一

士峨冠誦書詩謂袁徵君誠夫清秋約杖屨千步攀松枝寺後有山

名千步

寄題許愿夫抗雲樓

城居苦迫隘層闌上岩嶢措身方丈間千里心目超可以抗浮雲誰能顧塵囂凝峴有古臺遺碑正蕭條子固若星斗其魂安可招龐公輟耕際頗懷見凌霄賦詩托飛鳥長空何寥寥

贈劉無作

袖中殘卷在動是十年前逝水從前輩傷情有妙年博聞誰共學孤坐獨求禪莫恨相知晚文章倘爲傳

又贈劉無作



一家俱學佛之子更劬書諸老交游徧真乘究竟餘治生惟淨業志  
養足嘉蔬爲問龐居士成能更久如

道園學古錄卷之二十八

子來吳空阿寒

拾遺聖賢對東自古墨點五蕪執子固苦墨上其與安河所顯公  
然至古自金寶蘭士岩製詩良古文間千里以自賦河以成平建詳  
海國特願夫財靈期

李十卷

士地行精會精書卷之二十八

生無氣與古條林野神高五於臣感

高人所出也宋法時里思靈骨萬里靈彩因于隨靈真深越國靈

大母靈真去至今靈靈靈固收好靈顯水善

二凡八日坐介於戰林育靈異凡人掠肉食楚靈翁我英靈

昔六州水南八十里想善靈靈靈靈靈靈靈靈靈靈靈靈靈靈靈

靈靈靈靈靈靈靈靈靈靈靈靈靈靈靈靈靈靈靈靈靈靈靈靈

靈靈靈靈靈靈靈靈靈靈靈靈靈靈靈靈靈靈靈靈靈靈靈靈

靈靈靈靈靈靈靈靈靈靈靈靈靈靈靈靈靈靈靈靈靈靈靈靈